

摘藻堂四庫全書薈要

史部

欽定四庫全書薈要卷六千八百四十吏部

明史卷二百四十七

大學士張廷玉等奉敕修

列傳第一百三十五

劉綈

喬一琦

李應祥

童元鎮

陳璘

吳廣

鄧子龍

馬孔英

劉綈字省吾都督顯子勇敢有父風蔭為指揮使萬歷

初從顯討濟蘓蠻先登擒其酋阿勒達以功遷雲南迤
東守備改南京小教場坐營十年冬緬甸犯永昌騰越
巡撫劉世曾請濟師明年春擢綏遊擊將軍署騰衝守
備事緬甸去雲南遠自其酋莽瑞體以兵服諸番勢遂
強數擾邊境江西人岳鳳者商隴川驍桀多智為宣撫
多士寧記室士寧妻以妹鳳誘士寧往見瑞體潛與子
曩烏酖殺之并殺其妻子奪金牌印符受瑞體偽命代
士寧為宣撫瑞體死子應裏嗣鳳結耿馬賊罕虔南甸

土舍刀落參芒市土舍放正堂與應裏從父猛別弟阿
瓦等各率象兵數十萬攻雷美蓋達千崖南甸木邦老
姚思旬諸處殺掠無筭窺騰越永昌大理蒙化景東鎮
沅元江已陷順寧破蓋達又令曩烏引緬兵突猛淋指
揮兵繼勲等戰死鄧州土官知州何鈺鳳僚壻也使使
招之鳳繫獻應裏當是時車里八百孟養木邦孟艮孟
密蠻莫皆以兵助賊賊勢益盛黔國公沐昌祚聞警移
駐洱海巡撫劉世曾亦移楚雄大徵漢土軍數萬令參

政趙睿壁蒙化副使胡心得壁騰衝陸通霄壁趙州俞
事楊際熙壁永昌與監軍副使傅寵江忻督參將胡大
賓等分道進擊大小十餘戰積級千六百有奇猛別落
參皆殪參將鄧子龍擊斬罕虔于姚關應裏趙鳳東寇
姚關北據灣甸芒市會緹至軍軍大振鳳懼乃令妻子
及部曲來降緹責令獻金牌印符及蠻莫孟密地乃以
送鳳妻子還隴川為名分兵趨沙木籠山據其險而已
馳入隴川境鳳度四面皆兵遂詣軍門降緹復率兵進

緬緬將先遁留少兵隴川緝攻之鳳子曩烏亦降緝乃

攜鳳父子往攻蠻莫乘勝掩擊賊窘縛緬人及象馬來

獻蠻莫平遂招撫孟養賊賊將乘象走追獲之復移師

圍孟璉生禽其魁雲南平獻俘于朝帝為告謝郊廟受

百官賀大學士申時行以下悉進官廕子緝亦進副總

兵予世廕及改孟密安撫司為宣撫增設安撫二曰蠻

莫曰耿馬長官司二曰孟璉曰孟養千戶所二一居姚

關一居猛淋皆名之曰鎮安命緝以副總兵署臨元參

將移鎮蠻莫初鳳降本以計誘而巡撫世曾稱陣禽遂
行獻俘禮叙功及閩部未幾緬人復大舉寇孟密孟密
兵戰敗賊遂圍五章把總高國春率五百人援破賊數
萬連摧六營為西南戰功第一進官世廕副千戶緹亦
優叙蠻莫設安撫以土官思順有功特授之緹納其重
賄又縱兵將謝世祿等淫虐思順大怨緹將家子父顯
部曲多健兒緹擁以自雄征緬之役勅兵金沙江築將
臺于王驥故址威名甚盛然性貪御下無法兵還至騰

衝甲而譟焚民居綖在蠻莫聞之馳至犒以金錢始定
思順恐禍及叛歸莽酋詔草綖任以遊擊候調無何羅
雄變起羅雄者曲靖屬州也呂氏世為知州嘉靖時者
濬嗣職殺營長而奪其妻生子繼榮濬年老無他子繼
榮得襲職遂弑濬妖僧王道張道以繼榮有異相奉為
主用符術鍊丁甲煽聚徒黨獨外弟隆有義不從十三
年冬繼榮分黨四剽廣西師宗陸涼諸府州咸被患巡
撫劉世曾檄調漢土軍屬監司程正誼鄭璧等分禦之

會綖解官至霑益世曾喜令與裨將劉紹桂萬鏊分道討綖直搗繼榮寨拔之獲其妻妾數人繼榮逸去綖連克三砦斬王道張道追亡至阿拜張隆有義部卒斬繼榮首以獻賊盡平時首功止五十餘級而撫降者萬餘人論者稱其不妄殺初綖破繼榮有論其私財物者功不錄世曾為辨誣乃賜白金尋用為廣西參將移四川二十年召授五軍三營參將會朝鮮用師綖請率川兵五千赴援詔以副總兵從征至則倭已棄王京遁綖趨

尚州烏嶺亘七十里峭壁通一線倭拒險別將查大受
祖承訓等間道踰槐山出烏嶺後倭大經遂移駐釜山
浦綏及承訓等進屯大邱忠州以金羅水兵布釜山海
口朝鮮畧定未幾倭遣小西飛納款遂犯咸安晉州逼
全羅提督李如松急遣李平胡查大受屯南原祖承訓
李寧屯咸陽綏屯陝西扼之倭果分犯諸將並有斬獲
倭乃從釜山移西生浦送王子歸朝鮮帝命撤如松大
軍還止留綏及遊擊吳惟忠合七千六百人分扼要口

總督顧養謙力主盡撤綏惟忠亦先後還屬播酋陽應龍作亂擢綏四川總兵官綏戍朝鮮二年勞甚覲勘功優叙乃賄御史宋興祖興祖以聞法當褫部議綏功多請盡草雲南所加功級以副總兵鎮四川尋以應龍輸款而青海寇數擾邊特設臨洮總兵官移綏任之二十四年三月浩爾濟宰桑昆都埒赫達春塔布囊等掠番窺內地綏部將周國柱等擊之莽刺川腦斬首百三十有奇獲馬牛雜畜二萬計帝為告郊廟宣捷綏等進秩

予廕有差明年五月朝鮮再用師詔緹充禦倭總兵官
提督漢土兵赴討又明年二月抵朝鮮則楊鎬李如梅
已敗經畧邢玠乃分軍為三中董一元東麻貴西則緹
而陳璘專將水兵緹營水源倭亦分兵三路西行長據
順天壕砦深固緹欲誘執之遣使請與期會使者三反
緹皆單騎俟道中行長覘知之乃信期以八月朔定約
至期緹部卒洩其謀行長大驚逸去緹進攻失利監軍
參政王士琦怒縛其中軍緹懼力戰破之賊退不敢出

諸將三道進紼挑戰破之驅賊入大城已賊聞平秀吉

死將遁紼夜半攻奪栗林曳橋斬獲多石曼子引舟師

救陳璘邀擊之海中行長遂棄順天乘小艘遁班師進

紼都督同知世蔭千戶遂移師征楊應龍會四川總兵

官萬鏊罷即以紼代之時兵分八道川居其四川東又

分為二以綦江道最要令紼當之應龍熟紼才頗懼益

兵守要害二十八年正月諸將克丁山銅鼓嚴村遂直

搗楠木山羊簡臺三峒峒絕險賊將穆照等衆數萬連

營諸將憚之綈分兵攻其三面大戰于李漢壩生禽其
魁餘賊奔入峒乘勢克三關直搗峒前焚之賊多死盡
克三峒禽穆照及賊魁吳尚華是日綈督戰左持金右
挺劍大呼曰用命者賞不用命者齒劍門死者四十人
遂大捷應龍乃遣子朝棟惟棟及其黨楊珠統銳卒數
萬由松坎魚渡羅古池三道並進綈伏萬人羅古待松
坡賊以萬人伏營外待魚渡賊而別以一軍策應賊果
至伏盡起綈率部下轉戰斬首數百追奔五十里賊聚

守石虎關綖亦掘塹守初綖聞征播命逗遛多設難以
要朝廷言官交劾議調南京右府僉書綖至是聞之即
辭任總督李化龍以平播非綖不可固留之力薦于朝
綖乃復受事踰夜郎舊城攻克賊滴淚三坡瓦窑坪石
虎諸隘直抵婁山關婁山萬峯挿天叢箐中一徑纔數
尺賊設木關十三座排柵置深坑百險俱備綖分奇兵
為左右路間道趨關後而自督大軍仰攻奪其關追至
永安莊兩路軍亦會綖老将持重慮賊衝突聯諸營一

據婁山關為老營一據白石口為腰營一據永安莊為前營都指揮王芬者勇而寡謀每戰輒請為前鋒連勝有輕敵心獨營松門埡之衝距大營數里賊方有烏江之勝謀再奪婁山適穆照遣使洩芬孤軍狀賊乃襲殺芬守備陳大剛天全招討楊愈亦死失亡士卒二千人綏聞親率騎卒往救部將周以德周敦吉分兩翼夾攻賊始大奔追至養馬城而還是日應龍幾被獲乃不敢窺婁山綏懲前失剴近關堅壁且請濟師踰十餘日克

後水圉營于冠子山尋會馬孔英吳廣諸軍逼海龍圉
下與諸將共平賊綈功為多初李化龍薦綈言官謂綈
嘗納應龍賄宜奪官從軍部議謫為事官戴罪辦賊綈
德化龍使使齎玉帶一黃金百白金千投化龍家為化
龍父所叱投巡撫御史崔景營家亦如之化龍景營並
奏其事詔革綈任永不收錄沒其物于官已錄平播功
進左都督世廕指揮使三十六年雲南阿克反起綈討
賊總兵未至賊已平寢前命四十年四川建昌猺亂

綏為總兵官討之偕參政王之機分八道督諸將攻而已居中節制克桐槽沈渣阿都厦卜越北諸砦大小五十六戰斬馘三千三百有司諸猥巢穴一空綏為將數被黜抑性驕恣如故嘗拳毆馬湖知府詹淑淑改調綏奪祿半年久之以軍政拾遺罷歸四十六年帝念遼警召為左府僉書明年二月經畧楊鎬令綏及杜松李如柏馬林四路出師綏兵四萬由寬甸副使應乾監之遊擊喬一琦別監朝鮮軍並進綏鎮蜀久好用蜀兵久待

未至遂行而所分道獨險遶重岡疊嶺馬不成列次深河連克牛毛馬家二砦

大清兵五百守棟鄂路聞綏軍至逆戰綏縱兵圍數重大清兵衆寡不敵失二裨將傷五十人餘潰圍出綏已深入三百里杜松軍覆猶不知復整衆進遇

大清兵綏引軍登阿布達里岡將布陣

大清兵亦登岡出其上而別以一軍趨綏西岡上軍自高馳下奮擊綏軍綏殊死戰趨綏西者復從旁夾擊綏

軍不能支

大清兵乘勢追擊遇綈後二營軍未及陳復為

大清兵所乘大潰綈戰死養子劉招孫者最驍勇突圍
手格殺數人亦死士卒脫者無幾時應乾及朝鮮軍營
富察之野

大清兵移師遶之應乾兵及朝鮮兵列械將戰狂風驟
起揚沙石應乾發火器反擊已營大亂

大清兵趨擊大破之掩殺幾盡乾以數百騎免士一琦

亦為

大清兵所破走入朝鮮營朝鮮都元帥姜弘立副元帥
全景瑞懼率衆降一琦自縊死楊鎬聞杜松馬林師敗
馳召綏及李如柏還騎未至綏已覆獨如柏全事聞帝
遣中使祭陣亡將士恤綏家綏子諸將中最驍勇平緬
寇平羅雄平朝鮮倭平播酋平猱大小數百戰威名震
海內綏死舉朝大悚邊事日難為矣綏所用鎗鐵刀一百
二十斤馬上輪轉如飛天下稱劉大刀天啟初贈少保

世廕指揮僉事立祠曰表忠一琦字伯珪上海人

李應祥湖廣九谿衛人以武生從軍積功至廣西思思
參將萬歷七年巡撫張任大征十寨應祥與有功即其
地設三鎮築成列戍應祥方職營建會擢松潘副總兵
當事者奏留之以新秩涖舊任從總兵王尚文大破馬
平賊韋王明尋以署都督僉事入為五軍營副將十三
年改南京左府僉事出為四川總兵官松茂諸番列砦
四十八歲為吏民患王廷瞻撫蜀時嘗遣副將吳子忠

擊破丟骨人荒沒舌三砦諸酋乃降故事諸番歲有賞
賚番恃強要索無已其來堡也有下馬上馬解渴過堡
酒及熱衣氣力偏手錢戍軍更番亦奉以錢曰新班架
梁放狗躡草掛絲廷瞻一切除之西陲稍靖僅六七年
勢復猖獗是年夏楊柳番出攻普安堡犯歸水崖石門
坎遂入金瓶堡殺守將巡撫維遵屬應祥討之提卒三
千入茂州克一砦番恃險剽如故無何遵罷徐元泰代
檄諭之使三反番不應窺蒲江關斷歸水崖黃土坎道

築牆五哨溝絕東南聲援見官軍少相顧笑曰如此磨
子兵其奈我何磨子者謂屢旋轉而數不增也冬突平
夷堡掠良民剝其腸繞二牛角牛奔腸寸裂明年正月
遂圍蒲江關礮燬雉堞守將朱文達出斬數十人賊稍
解東南路始通元泰決計大征諸路兵悉集乃命遊擊
周于德將播州兵為前鋒遊擊邊之垣將酉陽兵為後
拒故總兵郭成將叙馬兵扼其吭參將朱文達將平茶
兵擊其脇而應祥居中節制參議王鳳監之應祥令軍

中各樹赤白幟一良民陷賊者徒手立赤幟下熟番不
附賊者徒手立白幟下即免罪番雖多遇急不相救國
師喇嘛者狡猾聯姻青海酋必圖與旺忠章喀等刻木
連大小諸姓軟血誼盟至是邀旺忠章喀先犯歸化以
嘗官軍于德誘禽喇嘛旺忠守備曹希彬復擊斬章喀
丟骨人荒沒舌三砦最强于德皆攻克復連破卜洞王
諸砦文達成之垣亦各拔數砦與于德軍合遂攻破蜈
蚣如兒諸巢嘉靖初之垣祖輪以指揮討茹兒賊被殺

漆其頭為飲器及是六十年之垣乃得之以還葬焉賊屢北窘悉棄輜重餌官軍官軍不顧斬關入賊多死河東平尋渡河而西連破西坡西革歪地乾溝樹底諸巢有小粟谷者首亂覘大軍西不設備郭成夜襲之大獲牛尾砦尤險惡將士三路夾攻火其柵斬酋合兒結父子河西亦平諸軍得所積糗粟留十日盡焚其砦以六月班師其逃窮谷者求偏頭結賽乞降應祥令埋奴設誓然後許之埋奴者番人反接其奴獻軍前譁天而誓

即牽至要路掘坎埋之露其首凡埋二十三人偏頭結
賽雅善天竺僧僧言歲在雞犬番有阮偏頭平之預匿
山谷中逸賊以為神跡而拜求之故偏頭為之請是役
也焚碣房千六百有奇生禽賊魁三十餘人俘馘以千
餘計自是羣番震驚不敢為患邊人樹碑記績焉建昌
越雋諸衛番裸雜居建昌逆酋曰安守曰五咱曰王大
咱與越雋印部黑骨夷並起為亂巡撫徐元泰議討徵
兵萬八千仍以文達之垣分將應祥統之副使周光鎬

監其軍十一月光鎬先渡灋黑骨與大咱已據相嶺焚

三峽橋五咱等亦寇禮州德昌二所時徵兵未集光鎬

先設疑以嘗相嶺賊賊果退據桐槽桐槽者大咱巢穴

也已而諸道兵盡抵越巂應祥令文達攻五咱之垣攻

大咱姑置黑骨夷弗問夜半走三百里抵禮州賊半渡

文達擊敗之遂渡河搗其巢之垣亦屢破桐槽大咱亡

入山峪中无何五咱據磨旗山挑戰官軍夾擊賊退保

毛牛山山延袤六七百里連大小西番界文達兵大破

之五咱西遁與安守合結砦西雞會所徵鹽井刺馬兵
三千至掙擲跳躍類非人形諸番所深畏應祥偵賊將
劫營乃潛移己營而令刺馬兵屯其處夜分賊來襲刺
馬起擊之伏屍狼籍諸將遂進攻西谿遂北至磨砦入
板番連兵圍五咱而令裨將田中科營麥達逼安守會
謀者報守謀襲中科應祥夜飲材官高達勝三巨觥令
率敢死士三百疾趨七十里抵麥達而伏守夜至遇伏
被禽守為羣寇魁守殪西南叩箆苴蘭靡莫諸酋皆震

怖商山四堡番乞降于之垣大小七板番乞降于文達
各埋奴道左呼號頓首誓世世不敢叛五咱勢窮走昌
州亦為裨將王言所獲土木安四兒者居連昌城中潛
剽掠于外至是知禍及率黨數百人走據虛郎溝諸軍
既滅五咱應祥遣之北示將討黑骨者四兒遂弛備將
士忽還軍襲之獲四兒復討大咱初大咱敗匿所親普
雄酋姑咱所大軍至姑咱懼密告裨將王之翰之翰搜
得大咱而黑夷酋阿弓等七人在大孤山亦先為之翰

所禽于是建昌越雋諸番盡平上首功二千有奇撫降者三千餘人時萬歷十五年七月也邛部屬夷賊乃者地近馬湖其酋撒假與外兄安興木爪夷白祿雷坡賊楊九乍等數侵掠內地巡撫曾省吾議討之會有都蠻之役不果乃建六堡益戍兵千二百人而諸蠻鴟張如故及建越興師又藏納叛人元泰乃令都指揮李獻忠等分勦賊詐降誘執獻忠等三將殺士卒數千人勢益猖獗應祥等師旋元泰益徵播州酉陽諸土兵合五萬

人令應祥督文達之垣及周于德諸將三道入故總兵
郭成亦從征十一月于德首敗白祿兵追至馬蝗山懸
索以登賊潰乘勢功木介夷射殺白祿追至利濟山雪
深數尺于德先登復大敗賊燬其巢初撒假與九乍率
萬人據山播州兵擊走之至是文達復破之大田壩合
于德兵追逐所向皆捷遊擊萬鰲躡擊撒假于鼠因獲
其妻子郭成復至三寶山大戰生禽撒假安興據巢守
文達鰲分道入獲其母妻安興擲金于途以緩追者遂

得脫已諸軍深入竟獲之他夷畏威降者二千餘人
悉獻還土田願修職貢兵乃罷凡斬首一千六百九十
餘俘獲七百三十有奇以其地置屏山縣功應祥屢
加都督同知元泰亦至兵部尚書當是時蜀中劇寇盡
平應祥威名甚著御史傅霈按部詰應祥冒饗應祥賄
以千金為所奏罷職兵部舉應祥僉書南京右府給事
中薛三才持不可二十八年大征播州貴州總兵官童
元鎮逗遛總督李化龍刻之薦應祥代時分兵八道貴

州分烏江興隆二道詔元鎮充為事官由烏江八應祥
由興隆入諸道尅二月望進兵應祥未受事副將陳寅
等已連克數國拒賊四牌高國下別遣兵從間道直搗
龍水固他將蔡兆吉又自乾坪抵箐岡過四牌賊首謝
朝俸營其地四面峭壁深箐前二關賊從高鼓譟官軍
殊死戰俘朝俸妻子乘勢抵河畔會烏江敗書聞歛兵
不進者旬日及應祥受任並趣諸將急渡寅等乃取他
道渡河而潛為浮橋以濟師諸軍渡賊失險乞降者相

繼應祥悉受之賊所恃止黃灘一關壁立衆死守會賊

徒石勝俸等萬餘人降告曰去黃灘三十里有三關入

播門戶也先襲破之則黃灘孤難守應祥然其計令偕

陳寅率精兵四千夜抵關下勝俸以數十騎誘其開門

殲其戍卒黃灘賊懼寅督諸將渡河攻關前勝俸由墳

林暗渡襲關後賊乃大敗應祥直抵海龍固合諸道兵

共滅楊應龍播既平還鎮銅仁明年改鎮四川播遺賊

吳洪盧文秀等惡有司法嚴而遵義知縣蕭鳴世失衆

心洪等遂稱應龍有子聚衆為亂應祥偕副使傅光宅捕之盡獲應祥尋卒于官以平播功贈左都督世蔭千戶應祥為將謀勇兼資所至奏績平蜀三大寇功最多童元鎮桂林右衛人萬歷中為指揮從討平樂賊莫天龍有功屢遷遊擊將軍高江猺反從呼良朋破平之歷永寧潯梧參將進副總兵擢署都督僉事為廣西總兵官未幾改廣東二十三年總督陳大科以元鎮熟蠻事仍移廣西岑溪西北為上下七山介蒼藤間有平田黎

峒白板九密等三十七巢東南為十三山有孔亮陀田桑園古攬魚修等百餘巢與廣東羅旁接山險菁深環數百里無日色賊首潘積善等據之久為民患及羅旁平積善懼乞降為設參將于大峒兵千餘戍之其後將領多培克士卒又疲弱賊復生心時出剽會歲饑粵東亡命浪賊數百人潛入七山誘諸徭為亂元鎮先以參將戌岑溪得諸徭心至是積善及其黨韋月咸願招撫自効十三山諸徭多受約束有訛言將勦北科徭者諸

署督撫陳大科戴燿屬元鎮討之當副將陳璘參將吳
廣罷官里居大科起令將兵與元鎮並進賊伐大木塞
道環怖菰簽元鎮佯督軍開道而潛從小徑上孔亮山
賊憑高弩矢雨下諸軍用火器攻大破之俘誠千五百
有奇餘招撫復業時府江韋扶仲等亦據險亂元鎮與
參政陸長庚謀募徭為間乘夜獲其妻子誘出劫伏兵
禽之餘黨悉平元鎮以功增秩賜金會日本破朝鮮廷
議由浙閩泛海搗其巢牽制之乃改元鎮浙江既而事

寢移鎮貴州二十八年李化龍大征楊應龍令元鎮督
永順鎮雄泗城諸土軍由烏江進元鎮憚應龍久駐銅
仁不進屢趣乃行時劉綎吳廣諸軍已進羣賊議分兵
守其黨孫時泰曰兵分則力薄乘官軍未集先破其弱
者餘自退矣應龍善之聞元鎮發烏江應龍喜曰
此易與耳謀縱之渡江密以計取監軍按察使楊
寅秋言烏江去播不遠宜俟諸道深入與俱進元
鎮不從于是永順兵先奪烏江賊遣千餘人沿江

叫罵以誘之諸軍既濟復奪老君關前哨參將謝
崇爵乘勢督泗城及水西兵再拔河渡關三月望
賊以步騎數千先衝水西軍軍中驅象出戰賊多
有中傷賊駕象者斃象反走擲火器者又誤擊已
營陣亂泗城兵先走崇爵亦走爭浮橋橋斷殺溺
死者數千人河渡既敗烏江相去六十里猶未知明日
參將楊顯發承順兵三百出哨道遇賊數萬咸為水西
裝承順兵不之疑賊掩殺三百人亦襲其裝直趨烏江

烏江軍信為水西永順軍不設備遂為賊所破爭先渡江賊先斷浮橋士卒多溺死顯及二子與馬元鎮所部三萬人不存什一將檢止崇爵等三人江水為不流貴陽聞警居民盡避入城遠近震動化龍用上方劍斬崇爵益徵兵檄鎮雄土官隴澄邀賊歸路隴澄者即安堯臣水西安疆臣弟也軍不與元鎮合獨全當事頗疑其通賊寅秋以鎮雄去播止二日令搗巢立效澄許之河渡未敗時澄已遣部將劉岳王嘉猷攻拔苦竹關及半

壩嶺暨敗二將移新站賊伏兵大水田別以五千人來襲敗還嘉猷乃揚聲搗大水田而潛以一軍拔大夫關直抵馬坎斷賊歸路與疆臣合賊遂遁會都指揮徐成將兵至合泗城土官岑紹勲兵再克河渡關賊將張守欽袁五受據長箐萬大林永順兵擊破之生禽守欽攻清潭洞復擒五受會朝議責元鎮敗狀令李應祥并將其軍遂合水西鎮雄諸部直抵海龍囤竟滅賊兵初興元鎮坐逗遛謫為事官及是逮至京下吏罪當死法司

援前岑溪功謫戍烟瘴遇赦廣西巡撫戴耀為請部議
不許竟卒于戍所

陳璘字朝爵廣東翁源人嘉靖末為指揮僉事從討英
德賊有功進廣東守備與平大盜賴元爵及嶺東殘寇
萬歷初討平高要賊鄧勝龍又平揭陽賊及山賊鍾月
泉屢進署都指揮僉事僉書廣東都司官軍攻諸良寶
副將李成立戰敗總督殷正茂請假璘參將自將一軍
賊平授肇慶遊擊將軍徙高州參將總督凌雲翼將大

征羅旁先下令雕勅璘所破凡九十巢已分十道大征
璘從信宜入會諸軍覆滅之以其地置羅定州及東安
西寧二縣即遷璘副總兵署東安參將事未幾餘孽殺
吏民責璘戴罪辦賊璘會他將朱文達攻破石牛青水
諸巢斬捕三百六十餘人授俸如故時東安初定璘大
興土木營寺廟役部卒且勒其出貲卒咸怒因事倡亂
掠州縣為巡按御史羅應鶴所劾詔奪璘官既而獲賊
乃除罪改狼山副總兵璘有謀畧善將兵然所至貪黷

復被劾褫官廢久之朝士多惜其才不敢薦二十年朝

鮮用兵以璘熟倭請命添注神機七營參將至則改神

樞右副將無何擢署都督僉事充副總兵官協守薊鎮

明年正月詔以本官統薊遼保定山東軍禦倭防海會

有封貢之議暫休兵改璘協守漳潮坐賄石星為所奏

復罷歸二十五年封事敗起璘故官統廣東兵五千援

朝鮮明年二月擢禦倭總兵官與麻貴劉綎並將部卒

次山海關鼓譟璘被責尋令提督水軍與貴綎及董一

元分道進副將陳蠶鄧子龍遊擊馬文煥季金張良相等皆屬焉兵萬三千餘人戰艦數百分布忠清全羅慶尚諸海口初賊泛海出沒官軍乏舟故得志及見璘舟師懼不敢往來海中會平秀吉死賊將遁璘急遣子龍偕朝鮮將李舜臣邀之子龍戰沒蠶金等軍至邀擊之倭無鬪志官軍焚其舟賊大敗脫登岸者又為陸兵所殲焚溺死者萬計時綏方攻行長驅入順天大城璘以舟師夾擊復焚其舟百餘石曼子西援行長璘邀之半

洋擊殺之殲其徒三百餘賊退保錦山官軍批之不出

已渡匿乙山崖深道險將士不敢進璘夜潛入圍其巖

洞比明礮發倭大驚奔後山憑高以拒將士殊死攻賊

遁走璘分道追擊賊無脫者論功璘為首絃次之貴又

次之進璘都督同知世廕指揮僉事師甫旋會有征播

之役命璘為湖廣總兵官由偏橋進副將陳良玘由龍

泉受璘節制二十八年二月軍次白泥應應龍子朝棟

率衆二萬渡烏江迎戰璘前禦之而分兩翼躡其後賊

少挫追奔至龍溪山賊合四牌賊共拒四牌在江外與
江內七牌皆五司遺種九股惡苗素助賊璘廣招撫乃
進軍龍溪偵知賊有伏令遊擊陳策用火器擊之賊據
險矢石雨下璘先登斬小校退者以徇把總吳應龍等
陷陣賊大潰退四牌保兒因璘二裨將逼之中伏璘募
死士從應龍等奮擊賊復潰奔據囤巔夜由山後遁黎
明追及于袁家渡復敗之四牌之賊遂盡三月望諸軍
為浮橋渡江知賊將張佑謝朝俸石勝俸等營七牌野

豬山璘即夜發抵苦練坪前鋒與戰後軍至夾擊之賊敗逃深箐官軍遂入苦菜關會童元鎮烏江師敗璘懼請退師總督李化龍不可璘乃進營楠木橋次涓潭賊悉聚青蛇長坎瑪瑙保子四圍地皆絕險而青蛇尤甚璘議同日攻則兵力弱止攻一圍則三圍必相助乃先攻三圍次及青蛇良玘師亦來會令伏圍後別以一軍守板角關防賊逸璘督諸將力攻三日賊死傷無算三圍遂下青蛇四面陡絕璘圍其三面購死士從瑪瑙後

附葛至山背舉礮賊惶駭諸軍進攻焚其茅屋賊退入
國內木石交下將士冒死上毀大柵二重前後擊之賊
大敗斬首一千九百有奇七牌之賊亦盡乃分兵六道
攻克大小三渡關乘勢抵海龍圍下諸將俱攻圍前獨
水西安疆臣攻其後相持四十餘日其下受賊重賄多
與通且潛以火藥遺賊故賊不備其後璘知之與監軍
者謀令疆臣退一舍璘移其處置鐵牌百餘距圍大許
賊弩無所施又為菰板于柵前賊每夜出劫為釘傷之

不敢復出應龍勢窮相聚哭化龍初有令諸將分日攻
六月六日璘與吳廣當進兵璘夜四更銜枚上賊斲睡
斬其守關者樹白幟鳴礮賊大驚潰散應龍自焚廣軍
亦至賊盡平遂移師討皮林皮林在湖貴交與九股苗
相接有吳國佐者洪州司特峒寨苗也桀黠無賴其從
父大榮以叛誅國佐收其妾黎平府持之急遂反自稱
天皇上將其黨石纂太稱太保合攻上黃堡誘敗參將
黃冲霄追至永從縣殺守備張世忠矣而嗽之掠屯堡

七十餘焚五開南城陷永從圍中潮所時方征播州未暇討既平播偏沅巡撫江鐸命璘與良玘合兵討之良玘失利明年鐸移駐靖州命璘率副將李遇文等七道進璘禽苗酋銀貢等遊擊宋大斌攻破特峒焚之國佐逃天浦四十八寨復入古州毛洞追獲之石纂太逃廣西上巖山指揮徐時達誘縛之賊黨楊永祿率衆萬餘屯白冲遊擊沈弘猷等夾攻生擒永祿諸苗悉平征播時璘投賄李化龍家會劉綎使為化龍父所麾璘使走

化龍疏于朝廷獲罪璘獨免後兵部尚書田樂推璘鎮貴州給事中洪瞻祖遂劾璘營求帝以璘東西積戰功卒如樂議貴東西二路苗曰仲家苗盤踞貴龍平新間為諸苗巨魁在水硤山介銅仁思石者曰山苗紅苗之羽翼也自平播後貴州物力大屈苗益生心剽掠無虛日三十三年冬巡撫郭子張請于朝明年四月令璘軍萬人攻水硤遊擊劉岳督宣慰安疆臣兵萬人攻西路並克之乃令璘移新添獨攻東路復克之生獲苗十二

人斬首三千餘級招降者萬三千餘人部內遂靖改鎮廣東卒官先叙平播功加左都督世廕指揮使既卒以平苗功贈太子太保再廕百戶吳廣廣東人以武生從軍累著戰功歷福建南路參將坐事罷歸會岑溪搖反總督陳大科檄廣從總兵童元鎮討之將士少却廣手斬一卒以徇遂大破之論功復故官萬歷二十五年以副總兵從劉綎禦倭朝鮮領水軍與陳璘相犄角俘斬甚衆甫班師大征播州擢廣總兵官以一軍出合江副

將曹希彬以一軍出永寧受廣節制廣屯二郎壩大行
招徠賊驍將郭通緒迎戰將士襲走之陶洪安村羅村
三砦土官各出降他部來歸者數萬廣擇其壯者從軍
通緒扼穿崖固廣督土漢軍擊破之劉綈馬孔英已入
播廣猶頗二郎總督李化龍趣之乃議分四哨進攻崖
門別遣永寧女土官奢世續等督夷兵二千扼桑木垵
諸要害以防饗道諸將連破數固進營母豬塘楊應龍
懼令通緒盡發關外兵拒敵廣伏礮手五百于磨槍垵

外南岡下而遣裨將趙應科挑戰堽夾兩山中甚隘通
緒橫梁衝應科應科佯北通緒追至堽遇伏急旋馬中
礮墜方躍上他馬伏兵攢刺之殪餘賊大奔官軍逐北
賊盡降遂薄崖門徑小止容一騎賊衆萬餘出關拒戰
希彬懸賞千金士攀崖競進追至第四關關上男婦盡
哭賊黨自殺其魁羅進恩率萬餘人出降其第一關猶
拒不下廣乘夜疾進奪其關關內民爭獻牛酒劉綎馬
孔英已入關李應祥陳璘猶在關外廣合希彬軍連戰

紅碗水土崖分水關皆捷遂進營水牛塘應龍大懼知
廣軍孤深入謀欲襲之乃遣人詐降廣測其詐堅壁以
待應龍擁衆三萬直衝大營諸將殊死戰會他將來援
賊乃退廣遂與諸道軍逼海龍固賊詐令婦人乞降哭
固上又詐報應龍仰藥死廣信之已知其詐急燒第二
關奪三山絕賊樵汲賊益窘旋與陳璘從固後登應龍
急自焚死獲其子朝棟出應龍屍烈燄中廣中毒矢失
聲絕而復甦遂以本官鎮四川踰年卒初廣之頓二郎

也有言其受賄養寇者詔謫充為事官後論功贈都督同知世廕千戶

鄧子龍豐城人貌魁梧驍捷絕倫嘉靖中江西賊起掠樟樹鎮子龍應有司募破平之累功授廣東把總萬歷初從大帥張元勲討平巨盜賴元爵已從平陳金鶯羅紹清賊魁黃高暉逸子龍入山生獲之遷銅鼓石守備尋擢署都指揮僉事掌浙江都司被論當奪職帝以子龍犯輕會麻陽苗金道侶等作亂擢參將討之大破賊

解散其黨五開衛卒胡若盧等火監司行署撻逐守備
及黎平守靖州銅鼓龍里諸苗咸響應為亂子龍火其
東門以致賊而潛兵入北門賊遂滅十一年閏二月緬
甸犯雲南詔移子龍永昌木邦部耿馬奸人罕虔與岳
鳳同為逆說緬酋莽應裏內侵虔從掠千崖南甸已引
渡查理江直犯姚關灣甸土知州景宗真及弟宗材助
之子龍急戰攀枝樹下陣斬宗真虔生獲宗材虔子招
罕招色奔三尖山令叔罕老率蒲人藥弩手五百阻要

害子龍餌蒲人以金盡知賊間道乃命裨將鄧勇等提
北勝滾渠諸番兵直搗賊巢而預伏兵山後夾擊夜半
上生禽招罕招色罕老及其黨百三十餘人斬首五百
餘級尖山巢空乃撫流移數千人會劉綖亦俘岳鳳以
獻帝悅進子龍副總兵予世蔭無何緬人復寇猛密把
總高國春大破之子龍以犄角功亦優叙自是蠻人先
附緬者多來附永昌騰衝夙號樂土自岳罕猖亂始議
募兵所募多亡命乃立騰衝姚安兩營劉綖將騰軍子

龍將姚軍不相能兩軍鬥帝以兩將皆有功置不問既而綏罷劉天俸代天俸逮遂以子龍兼統之子龍抑騰兵每工作輒虐用之而右姚兵及用師隴川子龍故為低昂椎牛饗士姚兵倍騰兵騰兵大不堪欲散去副使姜忻令他將轄之乃定而姚兵久驕因索餉作亂由永昌大理抵會城所遇剽掠諸兵夾擊之斬八十四級俘四百餘人亂始靖子龍坐褫官下吏十八年孟養賊思箇叛子龍方對簿巡撫吳定請令立功自贖帝許之命

未至定已與黔國公沐昌祚遣將却之无何丁改十寨賊普應春霸生等作亂勢張甚定大徵漢土軍令子龍軍其右遊擊楊威軍其左大破之斬首一千二百級招降六千六百人帝為告謝郊廟宣捷受賀復子龍副總兵署金山參將事先是猛廣土官思仁烝其嫂甘線姑欲妻之弗克偕其黨丙測叛歸緬數導入寇二十年攻益養犯蠻莫土同知思紀奔等練山子龍擊敗之乃去子龍尋被劾罷歸二十六年朝鮮用師詔以故官領水

軍從陳璘東征倭將渡海遁璘遣子龍偕朝鮮統制使
李舜臣督水軍千人駕三巨艦為前鋒邀之釜山南海
子龍素慷慨年踰七十意氣彌厲欲得首功急攜壯士
二百人躍上朝鮮舟直前奮擊賊死傷無算他舟誤擲
火器入子龍舟中火賊乘之子龍戰死舜臣赴救亦
死事聞贈都督僉事世廕一子廟祀朝鮮

馬孔英者宣府塞外降丁也積戰功為寧夏參將萬歷
二十年已拜反引套寇入掠孔英屢敗之布色圖入下

馬關從麻貴邀擊大獲進本鎮副總兵二十四年九月
卓哩克圖宰桑犯平虜橫城孔英偕參將鄧鳳力戰斬
首二百七十有奇賜金幣令推大將缺乃擢署都督僉
事以總兵涖舊任尋進秩為真二十七年卓哩克圖宰
桑復犯平虜興武孔英與杜桐等分道襲敗之再入又
敗之會大征播州楊應龍詔發陝西四鎮兵令孔英將
以往兵分八道孔英道南川獨險遠去應龍海龍囤六
七百里未至重慶推官高折枝監紀軍事請獨當一面

乃與參將周國柱先以石砭宣撫馬千乘兵破賊金筑
復督酉陽宣撫冉御龍敗賊于官壩孔英至軍平茶邑
梅兵亦集軍容甚壯先師期一日入真州用土官鄭葵
路麟為鄉道別遣邊兵千扼明月關諸軍鼓行前連破
四寨次赤崖抵清水坪封寧關破賊營十數逼桑木關
關內民降者日千計折枝結三大砦處之禁殺掠降者
日衆賊益孤關為賊要害山陰箐深賊憑高拒乃令千
乘御龍出關左右國柱搗其中賊用標鎗藥矢銳甚官

軍殊死戰奪其關逐北至風坎關賊復大敗連破九杆
黑水諸關苦竹羊崖銅鼓諸寨國柱攻金子壩無一人
疑有伏焚空砦十九嚴兵以待賊果突出擊敗之孔英
乃留王之翰兵守白玉臺衛饒道平茶邑梅兵守桑木
關而親帥大軍進營金子壩應龍聞桑木關破大懼遣
弟世龍及楊珠以銳卒劫之翰營之翰走殺饒卒無算
平茶兵來援賊始退孔英還擊世龍復却裨將劉勝奮
擊賊乃奔官軍進朗山口由朗山進蒙子橋深箐翁翳

賊處處設伏悉勦平之應龍益懼遣其黨詐降謀為內
應折枝盡斬之伏以待珠果夜劫營伏發賊驚潰追奔
至高坪已奪賊養馬城直抵海龍第二關下賊守兵益
多孔英軍已深入而諸道未有至者酉陽延綏兵皆退
賊躡殺官軍六十人居數日劉綏兵至乃合兵連克海
崖海門諸關賊走保固上竟覆滅初總督李化龍尅期
諸將莫利先入孔英所將邊將及諸土兵皆獷悍監
紀折枝勇而有謀故師獨先入道圍海龍諸將以固後

易攻爭走其後孔英獨壁關前錄功進都督同知世廕千戶久之以總兵官鎮貴州平金筑定番叛苗生擒首惡阿包阿牙等已而欲襲黃柏山苗苗知之先發敗官兵匿不報又誘執苗酋石阿四稱陣禽冒功為巡撫胡桂芳所劾罷歸卒

贊曰播州之役諸將用命合八道師歷時五月僅乃克之可謂勞矣劉綎勇畧冠諸將勞最多其後死事亦最烈鄧子龍始事姚安吉與綎將將老致命廟祀海隅昔

人謂武官不惜死兩人者蓋無愧于斯言也夫

明史卷二百四十七

欽定四庫全書

明史卷二百四十七考證

劉綎傳參將鄧子龍擊斬罕虔於姚關

臣

方煒按鄧

子龍傳子龍斬罕虔於姚關時並生禽招罕招色罕
老及其黨百三十餘人斬首五百餘級謹識

劉綎傳兵還至騰衝甲而譟焚民居

臣

方煒按明神

宗實錄兵還至騰衝焚城中民居一百七十餘家謹

識

劉綎傳詔革綎任以遊擊候調

臣

方煒按綎革任緣

撫按官奏綎受思順金寶牙錦諸物又縱把總謝世祿夏世勲陳其正等淫虐使其情甚不堪倉皇出奔宜治綎罪事詳明神宗實錄謹識

劉綎傳部議謫為事官戴罪辦事

臣

方煒按李化龍

傳劉綎謫為事官緣化龍劾諸大帥不用命者綎與焉與此互異謹識

劉綎傳詔綎革任永不收錄

臣

方煒按綎革任傳言

緣化龍景雲奏使使齎玉帶黃金事考明神宗實錄
景雲叅縱驕恣侮慢未及使使齎金玉事紀載互異
謹識

劉綎傳立祠曰表忠

臣方燁按劉綎於乾隆四十一

年

賜諡忠壯謹識

李應祥傳時分兵八道

臣方燁按八道謂烏江興隆

及綦江南川合江永寧沙溪偏橋龍泉詳李化龍傳

謹識

陳璘傳

吳廣附

坐事罷歸

臣

方煒按坐事罷歸史未

詳何事他書亦無可考謹識

鄧子龍傳被論當奪職

臣

方煒按被論當奪職史未

詳何事他書亦無可考謹識

鄧子龍傳詔移子龍永昌

臣

方煒按移子龍永昌傳

未詳其原委考明神宗實錄時緬賊莽酋犯永昌騰
越先是永昌叅將已裁革永騰獨守備一人撫臣劉

世會請以湖廣叅將鄧子龍為永昌叅將報可謹識
鄧子龍傳既而縱罷劉天俸代天俸逮遂以子龍兼統
之臣方煒按縱罷事詳縱傳至下文劉天俸逮及
後文子龍下吏並被劾史俱未詳何事他書亦無可
考謹識





總校官編修臣吳紹濬

欽定四庫全書叢要

史部
明史卷二百四十八
至五十八

詳校官主事臣陳本



欽定四庫全書薈要卷六千八百四十一 史部

明史卷二百四十八

大學士張廷玉等奉 敕修

傳第一百三十六

梅之煥

劉 策

徐縉芳
陳一元

李若星

耿如杞

胡士容

顏繼祖

王應豸等

李繼貞

方震孺

徐從治

謝璉
余大成等



梅之煥字彬父麻城人侍郎國楨從子也年十四為諸

生御史行部閱武之煥騎馬突教場御史怒命與材官

角射九發九中長揖上馬而去萬歷三十二年舉進士

改庶吉士居七年授吏科給事中東廠太監李浚誣拷

商人之煥劾其罪尋上言今天下民窮餉匱寇橫兵疲

言官舍國事爭時局部曹舍職掌建空言天下盡為虛

文所束縛有意振刷者不曰生事則曰苛求事未就而

謗興法未伸而怨集豪傑灰心庸人養拙國事將不可

為矣請陛下嚴綜覈以責實事通言路以重紀綱別臧
否以惜人才庶於國事有濟時朝臣部黨角立之煥廉
孤自勝嘗言附小人者必小人附君子者未必君子蠅
之附驥即千里猶蠅耳時有追論故相張居正者煥之
曰使今日有綜名實振紀綱如江陵者諭訛之徒敢若
此耶其持平不欲傳會人如此出為廣東副使禽誅豪
民沉殺烈女者民服其神海寇袁進掠潮州之煥扼海
道招散其黨卒降進改視山東學政天啟元年以通政

參議召遷太常少卿擢右僉都御史巡撫南贛丁內外艱家居當此之時魏客亂政應山楊連首發忠賢之奸忠賢恚甚拷殺連由此悍然益誅鋤善類慣悞楚人矣謂連被逮時過麻城連罪人也之煥與盤桓流涕當削籍其實連未嘗過麻城也無何逆黨梁克順誣以賊私詔徵賊莊烈帝即位乃免徵起故官巡撫甘肅大破套寇斬首七百餘級生得部長三人降六百餘人明年春寇復大入患晚豆創環大黃山而病諸將請掩之之煥

不可曰幸災不仁乘危不武不如舍之因以為德焉遂
不戰踰月羣寇望邊城搏顙涕泣而去冬京師戒嚴有
詔入衛且行西部乘虛犯河西之煥止留遣兵伏賀蘭
山後邀其歸路大兵出水泉峽口再戰再敗之斬首八
百四十有奇引軍東俄悍卒王進才殺參將孫懷忠等
以叛走蘭州之煥遂西定其變復整軍東明年五月抵
京師已後時矣有詔之煥入朝翌日又詔之煥落職候
勘溫體仁已柄政矣初體仁許錢謙益之煥移書中朝

右謙益至是體仁修隙之煥遂得罪之煥雖文士負材
武善射既廢無所見所居縣阻山多盜之煥無事輒率
健兒助吏捕無脫者先是甘肅兵變其潰卒畏捕誅往
往亡命山谷間為羣盜賊勢益張至是賊數萬來攻麻
城望見之煥部署輒引去帝追敘甘肅前後功復之煥
官廕子然終不召明年病卒

劉策字範董武定人萬歷二十九年進士由保定新城
知縣入為御史疏劾太僕少卿徐兆魁復力爭熊廷弼

行勘及湯賓尹科場事賓尹雖居家遙執朝柄嗾其黨
逐攻者孫振基王時熙已而給事中劉文炳劾兩淮巡
鹽御史徐縉芳言策入葉向高幕干票擬策同官陳一
元向高姻親顧權利時策按宣大疏言文炳為湯賓尹
死友代韓敬反噬昔年發奸如振基時熙輩今皆安在
向高亦以策無私交為辯雪文炳策屢疏相詆南京御
史吳良輔言文炳一疏而彈御史縉芳一元策及李若
星再疏而彈詞臣蔡毅中焦竑及監司李維楨他波及

尚多人才摧殘甚易清品如策雅望如竝不免詆斥天下寧有完人策復詆文炳倚方從哲為冰山苟一時富貴不顧清議一元論銓政嘗譏切向高時按江西見文炳疏憤甚遂揭文炳陰事且曰向高行矣今秉政者從哲文炳鄉人奴顏婢膝任好為之御史馬孟楨亦言敬闕節實真既斥兩侍郎兩給諫謝之矣乃伉直之劉策攻擊不休而同發奸之張篤敬復驅除將及何太甚也疏入帝皆不省策憤謝病去時攻兆魁廷弼賓尹輩者

黨人率指目為東林以年例出之外至四十六年秋在朝者已無可逐乃即家徙策為河南副使策辭疾不赴天啟元年春起天津兵備擢右僉都御史巡撫山西召拜兵部右侍郎協理戎政五年冬黨人劾策為東林遺奸遂削籍崇禎二年夏起故官兼右僉都御史總理薊遼保定軍務

大清兵由大安口入內地策不能禦被劾祖大壽東潰策偕孫承宗招使還明年正月與總兵張士顯並逮論

死棄市縉芳晉江人為御史首為顧憲成請諡劾天津
稅監馬堂九大罪有敢言名巡兩淮頗通賓客賂遺被
劾坐贓天啟中遣戍一元侯官人在江西振饑有法移
疾去天啟初起歷應天府丞御史余文縉劾向高及一
元遂落職崇禎初復官溫體仁柄國惡其附東林而以
為己門生也引嫌不召卒於家

李若星字紫垣息縣人萬歷三十二年進士歷知棗強
真定擢御史首劾南京兵部尚書黃克纘巡視庫藏陳

蠹國病商四弊請得稽十庫出納以杜侵漁不報巡按
山西請撤稅使因再劾克纘為沈一貫私人湯賓尹死
友宜罷不從還朝出為福建右參議移疾歸天啟初起
官陝西召為尚寶少卿再遷大理右少卿三年春以右
僉都御史巡撫甘肅陞辭發魏忠賢客氏之奸明年遣
將丁孟科官維賢擊河套松山諸部鎮番斬首二百四
十餘級捷聞未敘有傳若星將起義兵清君側之惡者
忠賢聞之即令許顯純入之汪文言獄詞誣其賄趙南

星得節鉞五年三月遂除若星名下河南撫按提問明年獄上杖之百戍廉州莊烈帝即位赦還崇禎元年起工部右侍郎兼右僉都御史總理河道追論甘肅功進秩二品黃河大決渰泗州沒睢寧城若星請修祖陵移睢寧縣治他所從之都城戒嚴遣兵入衛病歸遭父憂久之召為兵部右侍郎十一年以本官兼右僉都御史代朱燮元總督川湖雲貴軍務兼巡撫貴州討安位餘孽安隴壁及苗仲諸賊有功福王時解職以鄉邑殘破

寓居貴州桂王遷武岡召為吏部尚書未赴遭亂死於
兵

耿如杞字楚材館陶人萬歷四十四年進士除戶部主
事天啟初以才歷職方郎中軍書旁午日應數十事出
為陝西參議遷遵化兵備副使當是時逆奄竊柄諂子
無所不至至建祠祝釐巡撫劉詔懸忠賢畫像於喜峯
行署率文武將吏五拜三稽首呼九千歲如杞見其像
冕旒也半揖而出忠賢令詔劾之逮下詔獄坐贓六千

三百論死時又有胡士容者薊州參議也數忤其鄉官
崔呈秀呈秀銜之將為忠賢建祠士容又不奉命及士
容遷江西副使道通州遂誣以多乘驛馬侵盜倉儲捕
下詔獄掠治坐贓七千論死至秋將行刑而莊烈帝即
位崔魏相繼伏誅帝曰嚴衛深文附會鍛鍊朕深痛焉
其赦耿如杞予復原官胡士容等改擬於是如杞上疏
言臣自入鎮撫司五毒並施縛赴市曹者日有聞矣幸
皇上赦臣以不死驚魂粗定乞赦臣還家養疾帝不許

立擢如杞右僉都御史巡撫山西察罕呼爾敦圖據順義王地為邊患戰款無定策如杞言守邊為上修塞垣繕戰壘剷山塹谷事有緒矣二年京師戒嚴如杞率總兵官張鴻功以勅卒五千人赴援先至京師軍令卒至之明日汎地既定而後乃給餉如杞兵既至兵部令守通州明日調昌平又明日調良鄉汎地累更軍三日不得餉乃譟而大掠帝聞之大怒詔逮如杞鴻功廷臣莫敢救者四年竟斬西市方如杞之為職方郎也與主事

鹿善繼黨張鶴鳴排熊廷弼而庇王化貞疆事由是大壞及是得罪士容既釋出獄二年除陝西副使進右參政卒於官士容初令長洲捕豪惡築婁江石塘有政聲福王時贈如杞右僉都御史子章光進士尚寶卿士容字仁常廣濟人

顏繼祖漳州人萬歷四十七年進士歷工科給事中崇禎元年正月論工部冗員及三殿敎功之濫汰去加秩寄俸二百餘人又極論魏黨李魯生霍維華罪狀又有

御史袁弘勲者劾大學士劉鴻訓錦衣張道濬佐之繼
祖言六人朋邪亂政非重創禍無極帝皆納其言遷工
科右給事中三年巡視京城十六門濠塹疏列八事劾
監督主事方應明曠職帝杖斥應明外城庫薄議加高
厚繼祖言時絀難舉羸而止再遷吏科都給事中疏陳
時事十大弊憂歸八年起故官上言六部之政寃於尚
書諸司之務握之正郎而侍郎及副郎主事止陪列畫
題政事安得不廢督撫諸臣獲罪者接踵初皆由會推

然會推但六科掌篆者為主卿貳臺臣罕至且九卿臺
諫止選郎傳語有唯諾無翻異何名會推帝稱善尋擢
太常少卿以右僉都御史巡撫山東分兵扼境上河南
賊不敢窺青濟効故撫李懋芳侵軍餉二萬有奇被旨
嘉獎十一年畿輔戒嚴命繼祖移駐德州時標下卒僅
三千而奉本兵楊嗣昌令五旬三更調後令專防德州
濟南由此空虛繼祖屢請赦諸將劉澤清倪寵等赴援
皆逗留不進明年正月

大清兵克濟南執德王繼祖一人不能兼顧言官交章
劾繼祖繼祖咎嗣昌且曰臣兵少力弱不敢居守德之
功不敢不分失濟之罪請以爵祿還朝廷以骸骨還父
母帝不從逮下獄棄市終崇禎世巡撫被戮者十有一
人繼祖外則有薊鎮王應豸山西耿如杞宣府李養沖
登萊孫元化大同張翼明順天陳祖苞保定張其平四
川邵捷春永平馬成名順天潘永圖而河南李仙風被
逮自縊不與焉王應豸掖縣人為戶部主事諂魏忠賢

甫三歲驟至巡撫加右都御史崇禎二年春薊卒索餉
譟而甲參政徐從治諭散其衆應易置毒飯中欲誘而
盡殺之諸軍復大亂帝命巡按方大任廉得其尅餉狀
論死李養沖永年人歷兵部右侍郎巡撫宣府崇禎二
年既謝事御史吳玉劾其侵盜撫賞銀七萬及冒功匿
敗諸狀論死斃於獄張翼明永城人以兵部右侍郎巡
撫大同崇禎元年察罕呼爾敦圖入犯殺掠萬計翼明
及總兵官渠家楨不能禦竝坐死陳祖苞海寧人崇禎

十年以右副都御史巡撫順天明年坐失事繫獄飲鴆
卒帝怒祖苞漏刑錮其子編修之遴永不敘張其平偃
師人歷右僉都御史巡撫保定十一年冬坐屬邑失亡
多與繼祖駢死西市馬成名漂陽人潘永圖金壇人與
成名為姻婭崇禎十四年冬成名以右僉都御史巡撫
永平永圖亦起昌平兵備僉事未浹歲至巡撫畿輔被
兵成名永圖竝以失機十六年斬西市餘自有傳

李繼貞字徵尹太倉州人萬歷四十一年進士除大名

推官歷遷兵部職方主事天啟四年秋典試山東坐試錄刺魏忠賢降級已而削籍崇禎元年起武選員外郎進職方郎中時軍書旁午職方特增設郎中協理司事繼貞幹用精敏尚書熊明遇深倚信之曰副將以下若推擇我畫諾而已四年孔有德反山東明遇主撫繼貞疏陳不可且請調關外兵入勦明遇不能從後訖用其言滅賊初延綏盜起繼貞請發帑金用董搏霄人運法糴米輸軍前且令四方贖鍰及捐納事例者輸粟於邊

以撫饑民又言兵法撫勦竝用非撫賊也撫饑民之從賊者耳今斗米四錢已從賊者猶少未從賊而勢必從賊者無窮請如神廟特遣御史振濟故事齎三十萬石以往安輯饑民使不為賊以孤賊勢帝感其言遣御史吳甦以十萬金往繼貞少之帝不聽後賊果日熾繼貞為人強項在事清執請謁不得行大學士周延儒繼貞同年生屬總兵官於繼貞繼貞瞠目謝曰我不奉命必獲罪刑部獄甚寬可容繼貞也延儒銜之已加尚寶寺

卿當遷帝輒令久任田貴妃父弘遇以坐門功求優敘
不獲屢疏詆繼貞帝不聽中官曹化淳欲用私人為把
總繼貞不可乃囑戎政尚書陸完學言於尚書張鳳翼
以命繼貞繼貞亦不可鳳翼排繼貞議而用之化淳怒
與弘遇日伺其隙讒之帝坐小誤貶三秩會敘甘肅功
繼貞請起用故巡撫梅之煥帝遂發怒削繼貞籍已論
四川桃紅壩功復官致仕十一年用薦起歷兩京尚寶
卿明年春召對陳水利屯田甚悉遷順天府丞尋超拜

兵部右侍郎兼右僉都御史巡撫天津督薊遼軍餉乃
大興屯田列上經地招佃用水任人薄賦五議白塘葛
姑數十里間田大熟十四年冬詔發水師援遼坐戰艦
不具除名明年夏召為兵部添注右侍郎得疾卒於途
是夕星隕中庭贈右都御史官一子

方震孺字孩未桐城人移家壽州萬歷四十一年進士
由沙縣知縣入為御史熹宗嗣位逆璫魏忠賢內結客
氏震孺疏陳三朝艱危言宮妾近侍嘖笑易假窺閭可

慮中旨頻宣恐蹈斜封隱禍元年陳拔本塞源論曰曩者挺擊之案王之寀陸大受張庭李倖悉遭廢斥而東林如趙南星高攀龍劉宗周諸賢廢錮終身亟宜召復至楊漣之爭移宮可幸無罪不知何以有居功之說又有交通之疑將使天下後世謂堯舜在上而有交通矯旨之閹宦疏入直聲震朝廷其春巡視南城中官張曩劉朝被訟忠賢為請震孺不從卒上聞忠賢益恚怨遼陽既破震孺一日十三疏請增巡撫通海運調邊兵易

司馬日五鼓過公卿門籌畫痛哭而自請犒師是時三
岔河以西四百里人烟絕軍民盡竄文武將吏無一騎
東者帝壯其言發帑金二十萬震孺犒師六月震孺出
關延見將士弔死扶傷軍民大悅因上言河廣不七十
步一葦可航非有驚濤怒浪之險不足恃者一兵來斬
木為排浮以土多人推之如履平地不足恃者二河去
代子河不遠兵從代子徑渡守河之卒不滿二萬能望
其半渡而遏之乎不足恃者三沿河百六十里築城則

不能列柵則無用不足恃者四黃泥窪張又站沖淺之處可修守今地非我有不足恃者五轉眼冰合遂成平地間次置防猶得五十萬人兵從何來不足恃者六又言我以退為守則守不足我以進為守則守有餘專倚三岔作家萬一時事偶非榆關一綫遂足鎖薊門哉疏入帝命震孺巡按遼東監紀軍事震孺按遼居不廬食不火者七月議者欲棄三岔河退守廣寧震孺請駐兵振武軍法不嚴震孺請敕寧前監軍專斬逃軍逃將竝

從其言然是時經撫不和疆事益壞震孺再疏言山海無外衛宜亟駐兵中前以為眼目不省明年正月任蒲候代前屯而

大清兵已再渡三岔河先鋒孫得功不戰而呼於振武曰兵敗矣遂走巡撫王化貞在廣寧亦倉皇走列城聞之皆走惟震孺前屯無動當是時西平守將羅一貫已戰死參將祖大壽擁殘兵駐覺華島上於是震孺召水師帥張國卿相與謀曰今東師四外搜糧聞祖將軍在

島上有米豆二十餘萬兵十餘萬人民數萬戰艦器仗
馬牛無數東師即購得島兵得島兵以攻榆關豈有幸
哉於是震孺國卿航海見大壽慷慨語曰將軍歸相保
以富貴不歸震孺請以頸血濺將軍大壽泣震孺亦泣
遂相攜以歸獲軍民輜重無算有主事徐大化者忠賢
黨也劾震孺曰攘差都御史鄒元標奮筆曰方御史保
全山海無過且有社稷功給事中郭興治遂借道學以
逐元標元標去震孺亦即罷歸明年忠賢廣微興大獄

再募劾方御史者興治再論震孺河西賊私逮問掠治
坐贓六千有奇擬絞而揚州守劉鐸咒詛之獄又起遂
誣震孺與交通坐大辟繫獄有邏卒時時佐震孺飲啖
問之則曰小人有妻聞公精忠手治以獻者也輒報璫
曰某病草某瀕死璫以是防益疎明年莊烈帝嗣位得
釋還八年春流賊犯壽州州長吏適遷秩去震孺倡士
民固守賊自是不敢逼壽州巡撫史可法上其功用為
廣西參議尋擢右僉都御史巡撫廣西京師陷福王立

南京即日拜疏勤王馬士英阮大鍼憚之救還鎮震孺
竟鬱鬱憂憤而卒

徐從治字仲華海鹽人母夢神人舞戈於庭寤而生從
治舉萬歷三十五年進士除桐城知縣累官濟南知府
以卓異遷充東副使駐沂州天啟元年妖賊徐鴻儒反
鄆城連陷鄒滕嶧縣從治捕得其黨之伏沂者殺之請
就家起故總兵楊肇基主兵事而獻搃賊中堅之策遂
滅鴻儒事詳趙彥傳從治警敏通變其禦賊類主勦不

主撫故往往滅賊旋以右參政分守濟南錄功從治最
進右布政使督漕江南妖賊再起巡撫王惟儉奏留從
治仍守沂按臣主撫從治議不合遂告歸中外計議調
崇禎初以故秩飭薊州兵備薊軍久缺餉圍巡撫王應
豸於遵化從治單騎馳入陰部署夷丁標兵分營四門
按甲不動登城而呼曰給三月糧趣歸守汎地否將擊
汝衆應聲而散其應變多類此進秩左布政使再請告
歸四年起飭武德兵備孔有德反山東巡撫余大成檄

從治監軍明年正月馳赴萊州而登州已陷大成削籍
遂擢從治右副都御史代之與登萊巡撫謝璉竝命詔
璉駐萊州從治駐青州調度兵食從治曰吾駐青不足
鎮萊人心駐萊足係全齊命乃與璉同受事於萊有德
者遼人與耿仲明李九成毛承祿輩皆毛文龍帳下卒
也文龍死走入登州登萊巡撫孫元化官遼久素言遼
人可用乃用承祿為副將有德仲明為遊擊九成為偏
裨且多收遼人為牙兵是年大凌河新城被圍部檄元

化發勁卒泛海趨耀州鹽場示牽制有德詭言風逆改
從陸赴寧遠十月晦有德及九成子千總應元統千餘
人以行經月抵吳橋縣人罷市衆無所得食一卒與諸
生角有德扶之衆大譁九成先齎元化銀市馬塞上用
盡無以償適至吳橋聞衆怨遂與應元謀劫有德相與
為亂陷陵縣臨邑商河殘齊東圍德平既而舍去陷青
城新城整衆東余大成者江寧人也不知兵初為職方
嘗奏發大學士劉一燝私書齣之去後又以事忤魏忠

賢削籍歸有清執名而巡撫山東則白蓮妖賊方熾又有逃兵之變皆不能討及聞有德叛即託疾數日不能出不得已遣中軍沈廷諭參將陶廷鑑往禦則皆敗而走大成恐遂定議撫而元化軍亦至元化者故所號善西洋大礮者也至是亦主撫檄賊所過郡縣無邀擊賊長驅無敢一矢加者賊佯許元化降元化師次黃山館而返賊遂抵登州元化遣將張燾率遼兵駐城外總兵張可大率南兵拒賊元化猶招降賊賊不應五年正月

戰城東遼兵遽退南兵遂敗燾兵多降賊賊遣之歸士民爭請拒勿內元化不從賊遂入日夕城中火起中軍耿仲明都司陳光福等導賊入自東門城遂陷可大死之元化自刎不殊與參議宋光蘭僉事王徵及府縣官悉被執大成馳入萊州初登州被圍朝廷鑄大成元化三級令辨賊及登失守革元化職而以謝璉代有德既破登州推九成為主已次之仲明又次之用巡撫印檄州縣餉趣元化移書求撫於大成曰畀以登州一郡則

解大成聞於朝帝怒命革大成職而以從治代先是賊
攻破黃縣知縣吳世揚死之至是攻萊從治璉與總兵
楊御蕃等分陴守御蕃肇基子肇基從治所共勦滅妖
賊鄒滕者也御蕃積戰功至通州副總兵會登州陷兵
部尚書熊明遇奏署總兵官盡將山東兵與保定總兵
劉國柱天津總兵王洪兼程進遇賊新城洪先走御蕃
拒之二日不勝突圍出遂入萊城從治璉倚以勦賊賊
攻萊不下分兵陷平度知州陳所問自經賊益攻萊輦

元化所製西洋大礮日穴城城多頽從治等投火灌水
穴者死無算使死士時出掩擊之毀其礮臺斬獲多而
明遇卒惑大成撫議也命主事張國臣為贊畫往撫之
曰安輯遼人之在山東者以國臣亦遼人也國臣先遣
廢將金一鯨入賊營已而國臣亦入為賊移書遣一鯨
還報曰毋出兵壞撫局從治等知其詐叱退一鯨遣間
使三上疏言賊不可撫最後言萊城被圍五十日危如
累卵日夜望援兵卒不至知必為撫議悞矣國臣致書

臣內抄詔旨竝兵部諭帖乃知部臣已據國臣報達聖
聽夫國臣桑梓情重忍欺聖明而陷封疆其初遣一鯨
入賊營何嘗有止兵不攻之事果止兵或稍退舍臣等
何故不樂撫特國臣以撫為賊解而賊實借撫為緩兵
計一鯨受賊賄對援師則誑言賊數萬不可輕進對諸
將則誑言賊用西洋礮攻城將陷矣賴我招撫賊即止
攻夫一鯨三入賊營每入賊攻益急而國臣乃云賊嗔
我縋城下擊致彼之攻是使賊任意攻擊我不以一矢

加遺如元化斷送登城然後可成國臣之撫耶當賊過
青州大成擁兵三千勦賊甚易元化遺書謂賊已就撫
爾兵毋東大成遂止勿追致賊延蔓今賊視臣等猶元
化乃為賊解曰吳橋激變有因也一路封刀不殺也聞
天子詔遂止攻掠也將誰欺盈庭中國臣妄報必謂一
紙書賢於十萬兵授師不來職是故矣臣死當為厲鬼
以殺賊斷不敢以撫謾至尊洵國是悞封疆而戕生命
也疏入未報當是時外圍日急國柱洪及山東援軍俱

賴昌邑不敢進兩撫臣困圍城中於是廷議更設總督
一人以兵部右侍郎劉宇烈任之調薊門四川兵統以
總兵鄧玘調密雲兵統以副將牟文綬以右布政使楊
作楫監之往援萊三月宇烈作楫國柱洪玘及監視中
官呂直巡按御史王道純義勇副將劉澤清新兵參將
劉永昌朱廷祿監紀推官汪惟效等並集昌邑玘國柱
洪澤清等至萊州馬步軍二萬五千氣甚盛而宇烈無
籌畧諸師懦怯抵沙河日十輩往議撫縱還所獲賊陳

文才於是賊盡得我虛實益以撫愚我而潛兵繞其後
盡焚我輜重宇烈懼遂走青州撤三將兵就食玘等夜
半拔營散賊乘之大敗洪國柱走青濰玘走昌邑澤清
接戰於萊城傷二指亦敗走平度惟作楫能軍三將既
敗舉朝譁然而明遇見官軍不可用撫議益堅先是登
州總兵可大死以副將吳安邦代之安邦尤怯鈍奉令
屯寧海規取登州仲明揚言以城降安邦信之離城二
十五里而軍中軍徐樹聲薄城被禽安邦走還寧海登

既不能下而賊困萊久璉從治御蕃日堅守待救至四月十六日從治中礮死萊人大臨守陴者皆哭山東士官南京者合疏攻宇烈請益兵於是調昌平兵三千以總兵陳洪範統之洪範亦遼人明遇日跂望曰往哉其可撫也天津舊將孫應龍者大言於衆曰仲明兄弟與我善我能令其縛有德九成來巡撫鄭宗周予之兵二千從海道往仲明聞之偽函他死人頭紿之曰此有德也應龍率舟師抵水城延之入猝縛斬之無一人脫者

賊得巨艦勢益張島帥黃龍攻之不克而還遂破招遠圍萊陽知縣梁衡固守賊敗去宇烈復至昌邑洪範文綬等亦至萊州推官屈宜陽請入賊營講撫賊佯禮之宜陽使言賊已受命宇烈奏得請乃手書諭賊令解圍賊邀宇烈宇烈懼不往營將嚴正中昇龍亭及河賊擁之去而令宜陽還萊文武官出城開讀圍即解御蕃不可璉曰圍且六月既已無可奈何宜且從之遂偕監視中官徐得時翟昇知府朱萬年出有德等叩頭伏涕

泣交頤璉慰諭久之而還明日復令宜陽入請璉御蕃
同出御蕃曰我將家子知殺賊何知撫事璉等遂出有
德執之猝攻城却令萬年呼降萬年呼曰吾死矣汝等
宜固守罵不絕口而死賊送璉及二中官至登囚之正
中宜陽皆死初撫議興獨從治持不可宇烈諸將信之
而尚書明遇主其議從治死璉遂被禽於是舉朝恚憤
逮宇烈下獄調關外勁卒勦之罷總督及登萊巡撫不
設專任代從治者朱大典以行明遇坐主撫誤國罷歸

遂絕撫議八月大典合兵救萊兵甫接賊輒大敗圍解
有德走登州九成殺璉及二中官大典圍登九成戰死
城破追勦有德仲明入海遁生禽承祿等斬應元賊盡
平事詳大典傳詔贈從治兵部尚書賜祭葬廕錦衣百
戶建祠曰忠烈贈璉兵部右侍郎亦賜祭葬建祠廕子
以御蕃功多加署都督同知總兵鎮登萊而宇烈以次
年遣戍璉字君實監利人宇烈綿竹人大學士宇亮兄
也其戍也人以為失刑大成逮下獄遣戍赦還卒於家

元化字初陽嘉定人天啟間舉於鄉所善西洋礮法蓋得之徐光啟云廣寧覆沒條備京防邊二策孫承宗請於朝得贊畫經畧軍前主建礮臺教練法因請據寧遠前屯以策干王在晉在晉不能用承宗行邊還奏授兵部司務承宗代在晉遂破重關之非築臺製礮一如元化言還授元化職方主事己元化贊畫袁崇煥寧遠還朝尋罷崇禎初起武選員外郎進職方郎中崇煥己為經畧乞元化自輔遂改元化山東右參議整飭寧前兵

備三年皮島副將劉興治為亂廷議復設登萊巡撫遂擢元化右僉都御史任之駐登州明年島衆殺興治元化奏副將黃龍代汰其兵六千人及有德反朝野由是怨元化之不能討也賊縱元化還詔逮之首輔周延儒謀脫其死不得也則援其師光啟入閣圖之卒不得同張燾棄市光蘭徵元軍

贊曰疆圉多故則思任事之臣梅之煥諸人風采機畧尚大異於巽慙惟怯之徒而牽於文法或廢或死悲夫

叛將衡行縛而斬之一偏裨力耳中撓撫議委堅城界
之援師觀望不進徒擾擾焉設官命將何益之有撫議
之悞國也可勝言哉

明史卷二百四十八

欽定四庫全書

明史卷二百四十八考證

劉策傳疏劾太僕少卿徐兆魁復力爭熊廷弼行勘及

湯賓尹事

臣

黃壽齡按傳內所載熊廷弼諸人事

俱錯見諸人本傳惟徐兆魁事史未詳載他書亦無
可考謹識

劉策傳

徐縉芳附

劾天津稅監馬堂九大罪

臣

黃壽

齡按九大罪史未詳載他書亦無可考謹識

李若星傳福王時解職

臣

黃壽齡按解職史未詳何

事他書亦無可考謹識

顧繼祖傳繼祖言六人朋邪亂政非重創禍無極

臣

黃壽齡按李魯生霍維華罪狀俱詳魏忠賢傳至弘
勲劾劉鴻訓道濬佐之以及繼祖所言俱詳鴻訓傳
惟六人未臚其姓氏考弘勲傳亦僅舉弘勲道濬二
人餘則他書皆無可考謹識

顧繼祖傳疏列八事

臣

黃壽齡按八事及十大弊史

未詳載他書亦無可考謹識

顧繼祖傳而河南李仙風逮自縊

臣

黃壽齡按李仙

風被逮傳未詳何事他書亦無可考謹識

李繼貞傳坐小誤貶三秩

臣

黃壽齡按坐小誤貶三

秩史未詳何事他書亦無可考謹識

方震孺傳中官張昇劉朝被訟

臣

黃壽齡按張昇劉

朝被訟史未詳何事他書亦無可考謹識

徐從治傳

余大成附

又以事忤魏忠賢削籍歸

臣

黃

壽齡按余大成忤魏忠賢削籍歸傳未詳何事考忠
賢傳亦未載他書皆無可考謹識

欽定四庫全書薈要卷六千八百四十二

史部

明史卷二百四十九

大學士張廷玉等奉 敕修

列傳第一百三十七

朱燮元

徐如珂
林兆鼎

劉可訓

胡平表 盧安世

李 樞

史永安

劉錫元

王三善

岳具仰等
朱家民

蔡復一

沈敬煥
胡從儀

袁 善

周鴻圖 段伯煥

朱燮元字懋和浙江山陰人萬歷二十年進士除大理

評事遷蘇州知府四川副使改廣東提督學校以右參政謝病歸起陝西按察使移四川右布政使天啟元年就遷左將入覲會永寧奢崇明反蜀王要變元治軍永寧古蘭州地奢氏猺獍種也洪武時歸附世為宣撫使傳至崇周無子宗明以疏屬襲外恭內陰鷲子寅尤驍桀好亂時詔給事中明時舉御史李達徵川兵援遼宗明父子請行先遣土目樊龍樊虎以兵詣重慶巡撫徐可求汰其老弱餉復不繼龍等遂反殺可求及參政孫

好古總兵官黃守魁等時舉達負傷遁時九月十有七日也賊遂據重慶播州遺孽及諸亡命奸人蠱起應之賊黨符國禎襲陷遵義列城多不守崇明僭偽號設丞相五府等官統所部及徼外雜蠻數萬分道趨成都陷新都內江盡據木枰龍泉諸隘口指揮周邦太降冉世洪雷安世瞿英戰死成都兵止二千餉又絀變元檄徵石砮羅網龍安松茂諸道兵入援斂二百里內粟入城偕巡按御史薛敷政右布政使周著按察使林宰等分

陣守賊障革裏竹牌鉤梯附城壘土山上架蓬革伏弩射城中變元用火器擊却之又遣人決都江堰水注濠賊治橋得少息因斬城中通賊者二百人賊失內應賊四面立望樓高與城齊變元命死士突出擊斬三賊帥燔其樓既而援兵漸集登萊副使楊述程以募兵至湖廣遂合安綿副使劉芬謙石砭女土官秦良玉軍敗賊牛頭鎮復新都他路援兵亦連勝賊然賊亦愈增日發塚擲枯骸忽自林中大譟數千人擁物如舟高大許長

五十丈樓數重牛革蔽左右置板如平地一人披髮伏劍上載羽旗中數百人挾機弩毒矢旁翼兩雲樓曳以牛俯瞰城中城中人皆哭變元曰此呂公車也乃用巨木為機關轉索發礮飛千鈞石擊之又以大礮擊牛牛返走敗去有諸生陷賊中遣人言賊將羅乾象欲反正變元令與乾象俱至呼飲戍樓中不脫其佩刀與同卧酣寢象乾誓死報復縋而出自是賊中舉動無不知乃遣部將詐降誘崇明至城下伏起崇明跳免會諸道援

軍至夔元策賊且走投木牌數百錦江流而下令有司
沉舟斷橋嚴兵待乾象因自內縱火崇明父子遁走瀘
州乾象遂以衆來歸城圍百二日而解初朝廷聞重慶
變即擢夔元僉都御史巡撫四川以楊愈懋為總兵官
而擢河南巡撫張我續總督四川貴州雲南湖廣軍未
至而成都圍解官軍乘勢復州縣衛所凡四十餘惟重
慶為樊龍等所據其地三面阻江一面通陸副使徐如
珂率兵繞出佛圖關後與良玉攻拔之崇明發卒數萬

來援如珂迎戰檄同知越其杰躡賊後殺萬餘人監軍
僉事戴君恩令守備金富廉攻斬賊將張彤樊龍亦戰
死帝告廟受賀進君恩三官變元所遣他將復建武長
寧獲偽丞相何若海瀘州亦旋復先是國禎陷遵義貴
州巡撫李璵已遣兵復之永寧人李忠臣嘗為松潘副
使家居陷賊以書約愈懋為內應事覺合門遇害賊即
用其家僮給愈懋襲殺之并殺順慶推官郭象儀等再
陷遵義殺推官馮鳳雛當是時崇明未平而貴州安邦

彥又起安氏世有水西宣慰使安位方幼邦彥以故得倡亂朝議錄變元守城功加兵部侍郎總督四川及湖廣荆岳鄖襄陝西漢中五府軍務兼巡撫四川而以楊述中總督貴州軍務兼制雲南及湖廣辰常衡永十一府代我續共辦奢安二賊然兩督府分閫治軍川貴不相應賊益得自恣三年變元謀直取永寧集將佐曰我久不得志於賊我以分賊以合也乃盡製諸軍會長寧連破麻塘坎觀音庵青山崖天蓬洞諸砦與良玉兵會

進攻永寧擊敗奢寅於土地坎追至老軍營涼傘鋪盡
焚其營寅被二鎗遁樊虎亦中鎗死復追敗之橫山入
青崗坪抵城下拔之禽叛將周邦太降賊二萬副總兵
秦衍祚等亦攻克遵義崇明父子逃入紅崖大囤官軍
蹙而拔之連拔天台白崖楠木諸囤撫定紅潦四十八
砦賊奔入舊蘭州城五月為參將羅乾象所攻克崇明
父子率餘衆走水西龍場客仲壩倚其女弟奢社輝以
守初賊失永寧即求救於安邦彥邦彥遣二軍窺遵義

永寧燮元敗走之總兵官李維新等遂攻破客仲巢崇
明父子竄深箐維新偕副使李仙品僉事劉可訓參將
林兆鼎等搗龍塲生禽崇明妻安氏弟崇輝寅國禎皆
被創走錄功進燮元右都御史時蜀中兵十六萬土漢
各半漢兵不任戰而土兵驕淫不肯盡力成都圍解不
即取重慶重慶復不即搗永寧及永寧蘭州並下賊失
巢穴又縱使遠竄大抵土官利養寇官軍效之賊得展
轉為計崇明父子方窘甚燮元以蜀已無賊遂不窮追

永寧既拔拓地千里變元割膏腴地歸永寧衛以其餘地為四十八屯給諸降賊有功者令歲輸賦於官曰屯將隸于敘州府增設同知一人領之且移敘州兵備道於衛城與貴州參將同駐蜀中遂靖而邦彥張甚四年春陷貴州巡撫王三善軍沒明年總理魯欽敗於織金貴州總督蔡復一軍又敗廷臣以三善等失事由川師不協助議合兩督府乃命變元以兵部尚書兼督貴州雲南廣西諸軍移鎮遵義而以尹同臯代撫四川變元

赴重慶邦彥偵知之六年二月謀乘官軍未發分犯雲南遵義而令寅專犯永寧未行寅被殺乃己寅凶淫甚有阿引者受變元金錢乘寅醉殺之寅既死宗明年老無能為邦彥亦乞撫變元聞於朝許之乃遣參將楊明輝往撫變元旋以父喪歸偏沅巡撫閔夢得來代先是貴州巡撫王瑊謂督臣移鎮貴陽有十便朝議從之夢得乃陳用兵機宜請自永寧始次普市摩泥赤水百五十里皆坦途赤水有城可屯兵進白巖層臺畢節大方

僅二百餘里我既宿重兵諸番交通之路絕然後貴陽
遵義軍尅期進賊必不能支疏未報夢得召還代以尚
書張鶴鳴議遂寢鶴鳴未至明輝奉制書僅招撫安位
不云赦邦彥邦彥怒殺明輝撫議由此絕鶴鳴視師年
餘未嘗一戰賊得養其銳崇禎元年六月復召變元代
之兼巡撫貴州仍賜尚方劍錄前功進少保世廕錦衣
指揮使時寇亂久里井蕭條貴陽民不及五百家山谷
悉苗仲而將士多殺降報功苗不附變元招流移廣開

墾募勇敢用夢得前議檄雲南兵下烏撒四川兵出永寧下畢節而親率大軍駐陸廣逼大方總兵官許成名參政鄭朝棟由永寧復赤水邦彥聞之分守陸廣鴨池三岔諸要害別以一軍趨遵義自稱四裔大長老號崇明大梁王合兵十餘萬先犯赤水變元授計成名誘賊至永寧乃遣總兵官林兆鼎從三岔入副將王國禎從陸廣入劉養鯤從遵義入合傾其巢邦彥恃勇擬先破永寧軍還拒諸將急索戰四川總兵官侯良柱副使劉

可訓遇賊十萬於五峰山桃紅壩大破之賊奔據山巔
諸將乘霧力攻賊復大敗又追敗之紅土川邦彥宗明
皆授首時二年八月十有七日也捷聞帝大喜以成名
與良柱爭功賞久不行烏撒安效良死其妻安氏招故
霑益土莫安遠弟邊為夫負固不服變元乘兵威脅走
邊遂復烏撒變元以境內賊畧盡不欲窮兵乃檄招安
位位不決變元集將吏議曰水西地深險多箐篁蠻烟
棘雨莫辨晝夜深入難出今當扼其要害四面迭攻賊

乏食將自斃死於是攻之百餘日斬級萬餘養鯢遣人入大方燒其室廬位大恐三年春遣使乞降變元與約四事一貶秩二削水外六目地歸之朝廷三獻殺王巡撫者首四開畢節等九驛位請如約率四十八日出降變元受之貴州亦靖遂上善後疏日水西自河以外悉入版圖沿河要害臣築城三十六所近控蠻苗遠聯滇蜀皆立邸舍繕郵亭建倉廩賊必不敢猝入為寇鴨池安莊傍河可屯之土不下二千頃人賦土使自贍鹽酪

芻芟出其中諸將士身經數百戰咸願得尺寸地長子
孫請割新疆以授之使知所激勸帝報可初崇明邦彥
之死實川中諸將功而黔將爭之變元頗右黔將屢奏
於朝為四川巡按御史馬如蛟所劾變元力求罷帝慰
留之其冬討平定番鎮寧叛苗乃通威清等上六衛及
平越清平偏橋鎮遠四衛道路凡一千六百餘里繕亭
障置游徼貴陽東北有洪邊十二馬頭故宣慰宋嗣殷
地也嗣殷以助邦彥被勦滅乃即其地置開州又奏復

故施秉縣招流民實之四年阿迷州土官普名聲作亂陷彌勒州曲江所又攻臨安及寧州遠近震動巡撫王伉總兵官沐天波不能禦伉逮戍變元遣兵臨之遂就撫龍場壩者隣大方邦彥以假崇明崇明既滅總兵侯良柱欲設官屯守以自廣而安位謂己故地數舉兵爭變元不之禁會變元劾良柱不職良柱亦訐變元曲庇安氏納其重賄章下四川巡按御史劉宗祥宗祥亦劾變元受賄且以龍場永寧不置邑衛為欺罔帝以責變

元變元乃上言禦蠻之法來則安之不專在攻取也今
水西已納款惟明定疆界俾自耕牧以輸國賦若設官
屯兵此地四面孤懸中限河水不利應援築城守渡轉
運煩費且內激蘭州必死之關外挑水西扼吭之嫌兵
端一開未易猝止非國家久遠計帝猶未許後勘其地
果如所議論桃紅壩功進少師世廕錦衣指揮使一品
六年滿加左柱國再議平賊功世廕錦衣指揮僉事十
年安位死無嗣族屬爭立朝議又欲郡縣其地變元力

爭遂傳檄土目布上威德諸蠻爭納土獻重器變元乃裂疆域衆建諸蠻復上疏曰水西有宣慰之土有各目之土宣慰公土宜還朝廷各目私土宜畀分守籍其戶口徵其賦稅殊俗內嚮等之編氓大方西溪谷里北那要害之地築城戍兵足銷反側夫西南之境皆荒服也楊氏反播奢氏反蘭安氏反水西滇之定番小州耳為長官司者十有七數百年來未有反者非他苗好叛逆而定蕃性忠順也地大者跋扈之資勢弱者保世之策

今臣分水西地授之苗長及有功漢人咸俾世守虐政
苛斂一切蠲除參用漢法可為長久計因言其便有九
不設郡縣置軍衛因其故俗土漢相安便一地益墾闢
聚落日繁經界既正土苗不得侵軼民地便二黔地荒
确仰給外邦今自食其地省轉輸勞便三有功將士酬
以金則國幣方匱酬以爵則名器將輕錫以土田於國
無損便四既世其土各圖久遠為子孫計反側不生便
五大小相維輕重相制無事易以安有事易以制便六

訓農治兵耀武河上俾賊遺孽不敢窺伺便七軍民願
耕者給田且耕且守衛所自實無勾軍之累便八軍耕
抵餉民耕輸糧以屯課耕不拘其籍以耕聚人不世其
伍便九帝咸報可無何所撫土目有叛者諸將方國安
等軍敗燹元坐貶一秩已竟破滅之十一年春卒官年
七十三燹元長八尺腹大十圍飲啖兼二十人鎮西南
久軍資贖鍰歲不下數十萬皆籍之於官治事明決軍
書絡繹不假手幕佐行軍務持重謀定後戰尤善用間

使人各當其材犯法即親愛必誅有功廝養不遺賞也
馭蠻以忠信不妄殺苗民懷之初官陝西時遇一老叟
載與歸盡得其風力占侯適甲諸術將別語變元曰幸
自愛他日西南有事公當之矣內江牟康民者奇士也
兵未起恃語人曰蜀且有變平之者朱公乎已而果然
徐如珂字季鳴吳縣人萬歷二十三年進士除刑部主
事歷郎中主事謝廷讚疏請建儲帝怒盡貶刑曹官如
珂降雲南布政司照磨累遷南京禮部郎中廣東嶺南

道右參議遲羅貢使餽犀角象牙如珂不受天啟元年

遷川東兵備副使擊殺奢宗明黨樊龍復重慶奉檄搗

蘭州土城賊借水西兵十萬來援前軍少却捍子軍覃

懋勲挽白竹弩連中之賊大潰轉戰數十里斬首萬餘

級遂拔蘭州宗明父子竄水西去乃召如珂為太僕少

卿轉左通政魏忠賢逐楊漣如珂郊餞之忠賢銜甚遷

光祿卿修公解竣疏詞無所稱頌六年九月廷推南京

工部右侍郎遂削籍歸里三月治具飲客頃之卒崇禎

初以原推起用死歲餘矣尋錄破賊功賜祭葬進秩一
等官一子劉可訓澧州人萬歷中舉鄉試歷官刑部員
外郎天啟元年恤刑四川會奢崇明反圍成都可訓佐
城守有功擢僉事監軍討賊崇明走龍場壩可訓督諸
將進勦功最多總督朱燾元彙奏文武將吏功盛推可
訓乃遷威茂兵備參議崇禎元年改敘瀘副使仍監諸
將軍二年與總兵侯良柱破賊十萬衆於五峰山斬崇
明及安邦彥御史毛羽健言可訓將孤軍出入蠻烟瘴

雨者多年初無守土責因奉命錄囚而乃見危授命解
圍成都奏捷永寧掃除蘭穴逆寅授首五路大戰十道
並攻皆抱病督軍誓死殉國畀以節鉞誰曰不宜帝頗
納其言未幾畿輔被兵可訓率師入衛三年五月恢復
遵化擢右僉都御史巡撫順天永平督薊鎮邊務兵部
尚書梁廷棟囑私人沈敏於可訓敏遂交關為奸利御
史水佳允劾可訓落職歸後敘四川平寇功復官世廕
錦衣千戶未及起用卒於家胡平表雲南臨安人萬歷

中舉於鄉歷忠州判官天啟元年秋樊龍陷重慶平表
絕城下詣石砭土官奏良玉乞師號泣不食飲者五晝
夜良玉為發兵巡撫朱燮元檄平表監良玉軍會擢新
鄭知縣燮元奏留之改重慶推官監軍兼副總兵盡護
諸軍將戰數有功擢四川監軍僉事兼理屯田遷貴州
右參議宗禎元年總督張鶴鳴言平表偏州小吏慷慨
赴義復新都解成都圍連戰白市驛馬廟進據兩嶺俘
斬無算奪二郎關禽賊帥黑蓮頭追降樊龍遂克重慶

用六千人敗奢安二酋十萬兵請以本官加督師御史
銜賜之專敕必能梟逆賊首獻闕下部議格不行乃進
秩右參政分守貴寧道廕子錦衣世千戶久之擢貴州
布政使四年大計坐不謹落職十三年督師楊嗣昌薦
之詔以武昌通判監標下軍事嗣昌卒乃罷歸盧安世
貴州赤水衛人萬歷四十年舉於鄉為富順教諭天啟
初奢崇明反遣賊逼取縣印署令棄城走安世收印率
壯士擊斬賊無何賊數萬猝至安世單騎鬪手馘數人

詣上官請兵復其城帝用大學士孫承宗言超擢僉事
監軍討賊屢戰有功五年四月總督朱燾元上言自遵
義五路進兵永寧破巢之後大小數百戰禽獲幾四萬
人降賊將百三十四人招撫羣賊及土漢苗仲二十九
萬三千二百餘人皆監司李仙品劉可訓鄭朝棟及安
世等功武將則林兆鼎秦翼明羅乾象土官則陳治安
冉紹文悅先民等帝納之安世進貴州右參議遷四川
副使遵義監軍功復多崇禎初予世廕武職進右參政

久之解官歸卒林兆鼎福建人天啟中為四川參將積功至總兵官都督同知崇禎三年遣將討定番州苗連破十餘寨禽其魁四年遣將討湖廣苗黑苗攻拔二百餘寨加左都督召僉南京右府卒贈太子少保

李樗字長孺鄆人曾祖循義衡州知府祖生威鳳陽推官樗登萬歷二十九年進士授行人擢御史例轉廣東鹽法僉事歷山東參議陝西提學副使山東參政按察使四十七年秋擢右僉都御史巡撫貴州貴州宣慰同

知安邦彥者宣慰使堯臣族子堯臣死子位幼其母奢
社輝代領其事社輝永寧宣撫奢崇明女弟也邦彥遂
專兵柄會朝議徵西南兵援遼邦彥素桀黠欲乘以起
事詣檄請行檄諭止之邦彥歸益為反謀檄累疏請增
兵益餉中朝方急遼事置不問會檄被劾乃六疏乞休
天啟元年始得請以王三善代而奢崇明已反重慶陷
遵義貴陽大震檄遂留視事時城中兵不及三千倉庫
空虛檄與巡按御史史永安貸雲南湖廣銀四萬有奇

募兵四千儲米二萬石治戰守具而急遣總兵官張彥
方都司許成名黃運清監軍副使朱芹提學僉事劉錫
元等援四川屢捷遂復遵義綏陽湄潭真安桐梓二年
二月或傳崇明陷成都邦彥遂挾安位反自稱羅甸王
四十八支及他部頭目安邦俊陳其愚等盜起相應烏
撒土目安效良亦與通邦彥首襲畢節都司楊明廷固
守擊斬數百人效良助邦彥陷其城明廷敗歿賊遂分
兵陷安順平壩效良亦西陷霑益而邦彥自統水西軍

及羅鬼苗仲數萬東渡陸廣河直趨貴陽別遣王倫等
下甕安襲偏橋以斷援兵洪邊土司宋萬化糾苗仲九
股陷龍里檣永安聞變亟議城守會藩臬守令咸入覲
而彥方鎮銅仁運清駐遵義城中文武無幾人乃分兵
為五令錫元及參議邵應禎都司劉嘉言故副總兵劉
岳分禦四門檣自當北門之衝永安居譙樓團街市兵
防內變學官及諸生亦督民兵分堞守賊至盡銳攻北
城檣迎戰敗之轉攻東門為錫元所却乃日夕分番馳

突以疲官兵為三大樓臨城用婦人雞犬厭勝術檣永安烹飪雜斗米飯投飼雞犬而張虎豹皮于城樓以被之乃得施礮石夜縋死士燒其樓賊又作竹籠萬餘土壘之高踰睥睨永安急撤大寺鐘樓建城上賊棄籠去官軍出燒之數出城邀賊糧賊怒盡發城外塚徧燒村砦又先後攻陷廣州普定威清普安安南諸衛貴陽西數千里盡為賊據初被圍彥方運清來救敗賊於新添賊誘入龍里二將皆敗乃縱之入城曰使耗汝糧城中

果大困川貴總督張我續巡撫王三善擁兵不進檄永安連疏告急詔旨督責之會彥方等出戰頻得利賊退保澤溪乃遣裨將商士傑等率九千人分控威清新添二衛且乞援兵賊謂城必拔沿山列營柵隔內外間旬日一來攻輒敗去副總兵徐時逢參將范仲仁赴援遇賊壅城河仲仁戰不利時逢擁兵不救遂大敗諸將馬一龍白自強等殲焉援遂絕賊聞三善將進兵益日夜攻擊長梯蟻附城幾陷者數矣檄奮臂一呼士卒雖委

頓皆強起斫賊賊皆顛踣死城下王三善屢被嚴旨乃率師破重圍而進十二月七日抵貴陽城下圍始解檮乃辭兵事解官去三善既破賊我續無寸功乾沒軍資六十萬言官交劾解職侯勘我續邯鄲人刑部尚書國彥子其後黃緣魏忠賢起戶部侍郎進尚書名麗逆案云方官廩之告竭也米升直二十金食糠覈草木敗革皆盡食死人肉後乃生食人至親屬相噉彥方運清部卒公屠人市肆斤易銀一兩檮盡焚書籍冠服預戒家

人急則自盡皆授以刀繯城中戶十萬圍困三百日僅
存者千餘人孤城卒定皆櫟及永安錫元功熹宗用都
御史鄒元標言進櫟兵部右侍郎永安太僕少卿錫元
右參政及圍解當再敘功御史蔣允儀言安位襲職時
櫟索其金盆致啟釁章下貴州巡按侯恂覈未報御史
張應辰力頌櫟功恂覈上亦白其誣帝責允儀初永安
遣運清往新添平越趣援兵懼其不濟欲出城督之錫
元疑永安有去志以咨櫟櫟止永安及錫元當絕食時

議發兵護標永安出城身留死守永安亦疑錫元而運清因交構其間三人遂相失永安詆錫元議留身守城欲輸城於賊標亦與謀兩人上章辨吏部尚書趙南星左都御史孫瑋等力為三人解而言永安功第一當不次大用標已進官當召還錫元已進參政當更優敘詔可之然標竟不召錫元亦無他擢二人並還里獨永安在朝連擢太常卿右僉都御史巡撫寧夏再以兵部右侍郎總督三邊標及諸將吏功迄不敘六年秋御史田

景新頌櫟功不納崇禎元年給事中許譽卿再以金盆
事劾櫟帝召咨廷臣獨御史毛羽健為櫟解吏部尚書
王永光等議如羽健言給事中余昌祚詆羽健曲庇帝
下川貴總督朱燮元等再覈羽健乃上疏曰安奢世為
婚姻同謀已久奢寅寇蜀邦彥即寇黔何用激變當貴
陽告急正廣寧新破之日舉朝皇皇已置不問後知櫟
不死孤城尚存始命王三善往救至則圍已十月安酋
初發難崇明欲取成都作家邦彥欲圖貴陽為寇西取

雲南東擾偏沅荆襄非檣扼其衝東南盡塗炭乃按臣
永安不二三載躋卿貳督師三邊檣則投閒林壑又以
永安謗書為檣罪按金盆之說發自允儀當年已自承
風聞何至今猶執為實事貴州人亦爭為檣頌冤變元
乃偕巡按御史趙洪範交章雪其枉檣事始白九年冬
敘守城功進一秩賚銀幣久之卒於家錫元長洲人崇
禎中任寧夏參政永安武定人共檣城守功多以在邊
時建魏忠賢祠後為御史寧光先論罷不為人所重云

王三善字彭伯永城人萬歷二十九年進士由荊州推官入為吏部主事齊楚浙三黨抨擊李三才三善自請單騎行勘遂為其黨所推歷考功文選郎中進太常少卿天啟元年十月擢右僉都御史代李樞巡撫貴州時奢崇明已陷重慶明年二月安邦彥亦反圍貴陽樞及巡按御史史永安連章告急趣三善馳援三善始駐沅州調集兵食已次鎮遠再次平越去貴陽百八十里方遣知府朱家民乞兵四川兵未至不敢進疏請便宜從

事給空名部牒得隨才委任帝悉報可至十二月朔知
貴陽圍益困集衆計曰失城死法進援死敵等死耳盍
死敵乎乃分兵為三副使何天麟等從清水江進為右
部僉事楊世賞等從都勻進為左部自將二萬人與參
議向日升副總兵劉超參將楊明楷劉志敏孫元謨王
建中等由中路當賊鋒舟次新安抵龍頭營超前鋒遇
賊衆欲退斬二人乃定賊酋阿成驍勇超率步卒張良
俊直前斬其頭賊衆披靡三善等大軍亦至遂奪龍里

城諸將議駐師觀變三善不可策馬先邦彥疑三善有衆數十萬乃潛遁餘賊退屯龍洞官軍遂奪七里沖進兵畢節舖元模明指連敗賊其渠安邦俊中礮死生獲邦彥弟阿倫遂抵貴陽城下賊解圍去標永安請三善入城三善曰賊兵不遠我不可即安營於南門外明日破賊澤溪賊走渡陸廣河居數日左右二部兵及湖廣廣西四川援兵先後至三善以二萬人破賊十萬有輕敵心欲因糧於敵舉超為總兵官令渡陸廣趨大方搗

安位巢以世賞監之總兵官張彥方渡鴨池搗邦彥巢以天麟監之漢土兵各三萬別將都司線補袞出黃沙渡尅期並進超等至陸廣連戰皆捷彥芳部將秦民屏亦破賊五大寨諸將益輕敵邦彥先合崇明效良兵誘官軍深入三年正月超渡陸廣賊薄之獨山土官蒙詔先遁官軍大敗爭渡河超走免明楷被執諸將姚旺等二十六人殲焉賊遂攻破鴨池軍部將軍弘化先逃諸營盡潰彥方退保威清惟補袞軍獨全諸苗見王師失

利復蠱起土酋何中尉進據龍里而邦彥使李阿二圍
青巖斷定番餉道令宋萬化吳楚漢為左右翼自將趨
貴陽遠近大震三善急遣遊擊祁繼祖等取龍里王建
中劉志敏救青巖繼祖燔上中下三牌及賊百五十砦
建中亦燔賊四十八莊龍里定番路皆通三善又夜遣
建中繼祖搗楚漢八姑蕩燔莊砦二百餘薄而攻之賊
溺死無算萬化不知楚漢敗詐降三善佯許而令諸將
捲甲趨之萬化倉皇出戰被禽邦彥為奪氣羣苗復效

順三善給黃幟令樹營中邦彥望見不敢出增兵守鴨池陸廣諸要害時崇明父子屢敗邦彥救之為川師敗走總理魯欽等勦禽中尉彥方亦追賊鴨池而賊復乘間陷普安總督楊述中駐沅州畏賊朝命屢趣始移鎮遠議與三善左三善屢求退不許會崇明為川師所窘逃入貴州龍場依邦彥三善議會師進討述中暨諸將多持不可三善排羣議以閏十月自將六萬人渡烏江次黑石連敗賊斬前逃將覃弘化以徇賊乃柵漆山日

遣遊騎掠樵採者軍中乏食諸將請退師三善怒曰汝
曹欲退不如斬吾首詣賊降諸將乃不敢言三善募壯
士逼漆山緋衣戎冠肩輿張蓋自督陣語將士曰戰不
捷此即吾致身處也旁一山頗峻麾下軍據其顛賊倉
皇拔柵爭山將士殊死戰賊大敗邦彥狼狽走三善渡
渭河降者相繼師抵大方入居安位第位皆母奢社輝
走火灼堡邦彥竄織金先所陷將楊明楷乃得還位窘
遣使詣述中請降述中令縛崇明父子自贖三善責并

獻邦彥往返之間賊得用計為備三善以賊方平議郡

縣其地諸苗及土司咸惴恐益合於邦彥三善先約四

川總兵官李維新滅賊以餉乏辭三善屯大方久食盡

述中弗為援不得已議退師四年正月盡焚大方廬舍

而東賊躡之中軍參將王建中副總兵秦民屏戰歿官

軍行且戰至內莊後軍為賊所斷三善還救士卒多奔

陳其愚者賊心腹先詐降三善信之與籌兵事故軍中

虛實賊無不知至是遇賊其愚故縱轡衝三善墜馬三

善知有變急解印授付家人拔刀自刎不殊羣賊擁之
去罵不屈遂遇害同知梁思泰主事田景猷等四十餘
人皆死賊拘監軍副使岳具仰以要撫具仰遣人馳蠟
書於外被殺三善個儻負氣多權畧家中州好交四方
奇士俠客後輒得其用救貴陽時得邸報不視曰吾方
辦賊奚暇及此且朝議戰守紛紛閱之徒亂人意其堅
決如此然性卞急不能持重竟敗先以解圍功加兵部
右侍郎既歿巡按御史陸獻明請優卹所司格不行崇

禎改元贈兵部尚書世廕錦衣僉事立祠祭祀九年冬
再敘解圍功贈太子少保大方之役御史貴陽徐卿伯
上言邦彥招四方奸宄多狡計撫臣得勝驟進視蠹苗
不足平不知澤溪以西渡陸廣河皆鳥道深林叢箐彼
誘我深入以木石塞路斷其郵書阻餉道遮援師則彼
不勞一卒不費一矢而我兵已坐困矣後悉如其言岳
具仰延安人舉於鄉歷瀘州知州戶部郎中貴州亂朝
議具仰知兵用為監軍副使內莊之敗監軍四人其三

得脫還惟具仰竟死田景猷貴州思南人天啟二年甫
釋褐憤邦彥反疏請賈敷宣諭廷議壯之即擢職方主
事賊方圍貴陽景猷單騎往曉以禍福令釋兵歸朝邦
彥不聽欲屈景猷日陳寶玩以誘之不為動賊乃留景
猷遣其徒恐以危禍景猷怒拔刀擊之其人走免羈賊
中二年至是遇害具仰贈光祿卿景猷太常少卿並錄
其一子楊明楷者銅仁烏羅司人內莊之敗明楷為中
軍免死後從魯欽討長田賊功最終副總兵朱家民字

同人曲靖入萬歷三十四年舉於鄉為涪州知州天啟二年官貴陽知府奉三善命乞援兵於四川又借河南兵共解其圍乃撫傷殘招流移寬徭賦遠邇悅服丁父憂奪情擢安晉監軍副使加右參政崇禎時就遷按察使左布政以平寇功加俸一級久之致仕歸卒自邦彥始亂雲貴諸土酋盡反攻陷安南等上六衛雲南路斷其後路雖通羣苗猶出沒為患家民率參將許成名等討平盤江外阿野魯頗諸砦於是相度盤江西坡板橋

海子馬場諸要害築石城五宿兵衛民又於其間築六城解舍廬井畢備羣苗惕息行旅晏然盤江居雲貴交兩山夾峙一水中絕湍激迅悍舟濟者多陷溺家民倣濶滄橋制冶鐵為絙三千有六長數百丈貫兩崖之石而懸之覆以板類於蜀之棧而道始通

蔡復一字敬夫同安人萬歷二十三年進士除刑部主事歷兵部郎中居郎署十七年始遷湖廣參政分守湖北進按察使右布政使以疾歸光宗立起故官遷山西

左布政使天啟二年以右副都御史撫治鄖陽歲大旱
布衣素冠自繫於獄遂大雨奢崇明安邦彥反貴州巡
撫王三善敗歿進復一兵部右侍郎代之兵燹之餘斗
米值一金復一勞徠拊循人心始定尋代楊述中總督
貴州雲南湖廣軍務兼巡撫貴州賜尚方劍便宜從事
復一乃召集將吏申嚴紀律遣總理魯欽等救凱里斬
賊衆五百餘賊圍晉定遣參將尹伸副使楊世賞救却
之搗其巢斬首千二百級發兵通盤江路斬逆酋沙國

珍及從賊五百欽與總兵黃越等復破賊於汪家冲蔣
義寨斬首二千二百長驅織金織金者邦彥巢也緣道
皆重關疊隘木石塞山徑將士用巨斧開之或攀藤穿
竇而入賊戰敗遁深箐斬首復千級窮搜不得邦彥乃
班師是役也焚賊巢數十里獲牛馬甲仗無算復一以
隣境不協討致賊未滅請敕四川出兵遵義抵水西雲
南出兵霑益抵烏撒犄角平賊帝悉可之因命廣西雲
南四川諸郡隣貴州者聽復一節制五年正月欽等旋

師渡河賊從後襲擊諸營盡潰死者數千人時復一為
總督而朱變元亦以尚書督四川湖廣陝西諸軍以故
復一節制不行於境外欽等深入四川雲南兵皆不至
復一自劾因論事權不一故敗巡按御史傅宗龍亦以
為言廷議移變元督河道令復一專督五路師御史楊
維垣獨言變元不可易帝從之解復一任聽勘而以王
城為右僉都御史代撫貴州復一侯代仍拮据兵事與
宗龍計勦破烏粟螺蝦長田及兩江十五砦叛苗斬七

百餘級賊黨安效良首助邦彥陷霑益雲南巡撫沈儼
外遣兵討之未定遷侍郎去代者閔洪學招撫之亦未
定及是見雲南出師懼約邦彥犯曲靖尋旬復一遣許
成名往援賊望風遁又遣劉超等討平越苗阿秩等破
百七十砦斬級二千三百有奇至十月復一卒於平越
軍中訃聞帝嘉其忠勤贈兵部尚書諡清憲任一子官
復一好古博學善屬文耿介負大節既歿素無遺貲域
既至見邦彥不易平欲解去黃緣魏黨李魯生遷南京

戶部右侍郎崇禎初被劾歸流賊陷應城遇害沈儆炆
字叔永歸安人父子木官南京右都御史儆炆登萬歷
十七年進士歷河南左布政使入為光祿卿四十七年
以右副都御史巡撫雲南神宗末詔增歲貢黃金二千
儆炆疏爭會光宗立如其請雲龍州土舍段進志掠永
昌大理儆炆討禽之安邦彥反諸土目並起安效良陷
霑益李賢陷平夷祿千鍾犯尋甸嵩明張世臣攻武定
邦彥女弟設科掠曲靖轉寇陸涼儆炆起故參將雲南

人袁善令率守備金為貴土官沙源等馳救高明大破之賊轉寇尋甸復大敗去乃請復善故官與諸將分討賊數有功會倣峽遷南京兵部右侍郎而代者閔洪學至乃以兵事委之去後拜南京工部尚書為魏忠賢黨石三畏所劾落職閒住崇禎初復官卒於家子允培禮科都給事中洪學既至亦任用袁善賊陷普安圍安南善攻破之通上六衛道王三善之歿六衛復梗善護御史傅宗龍赴黔道復通已而敗安效良於霑益又敗賊

於炎方馬龍七年御史朱泰禎核上武定嵩明尋甸破賊功大小百三十三戰斬四千六百餘級請宣捷告廟從之魏忠賢等並進秩廕子善加都督同知世廕錦衣指揮僉事崇禎初卒官周鴻圖字子固即墨人起家歲貢生知宿遷縣以侯恂薦遷貴陽同知監紀軍事積軍功至知府會勻哈叛苗與邦彥相倚為亂天啟六年春巡撫王璠及御史傅宗龍使監胡從儀及都司張雲鵬軍分道搜山所向摧破會聞魯欽敗賊復趨龍場助邦

彥已而邦彥屢敗賊返故巢鴻圖從儀等攻之破焚一百餘寨斬首千二百餘級鴻圖擢副使分巡新鎮道從儀進副總兵當是時鴻圖駐平越轄下六衛參議段伯玠駐安莊轄上六衛千餘里間奸宄屏息兩人力也鴻圖終陝西參政伯玠雲南晉寧人由鄉舉為鎮寧知州力拒安邦彥超擢僉事分巡鎮寧邦彥寇普定偕從儀擊破之由此擢參議胡從儀山西人天啟四年以遊擊援普定功多既而破賊長田以參將討平勻哈後又與

諸將平老蟲添崇禎三年討平苗賊汪狂抱角召為保定總兵官卒於京邸贈都督僉事黔人愛之為立真將軍碑

贊曰奢安之亂竊發於蜀蔓延於黔勞師者幾十載變元戡之以兵威因俗制宜開屯設衛不亟亟焉郡縣其地以蹈三善之覆轍而西南由茲永寧庶幾可方趙營平之制羌韋南康之鎮蜀者歟

明史卷二百十九

欽定四庫全書

明史卷二百四十九考證

朱燮元傳龍等遂反殺可求及參政孫好古總兵官黃
守魁等臣方煒按是時與可求等同遇害者為參
政駱日升李繼周知府章文炳同知王世科熊嗣先
推官王三宅總兵王守忠參將萬金王登爵等見明
紀事本末傳未詳載謹附識

朱燮元傳女土官秦良玉軍敗賊牛頭鎮復新都

臣

方煒按是年十一月良玉先遣其弟民屏姪翼明發兵四千倍道潛度重慶營南坪關而自統精兵六千趨成都見明紀事本末謹附識

朱燮元傳監軍僉事戴君恩令守備金富廉攻斬賊將張彤樊龍亦戰死

臣

方煒按土司傳及明紀事本

末燮元是時以計擒樊龍殺之張彤亦為亂兵所殺生擒龍子友邦及其黨張國用等三十餘人遂復重慶與此所載互異謹附識

朱燮元傳安氏世有水西宣慰使安位方幼邦彥以故得倡亂臣方燁按邦彥位之叔父也素懷異志與崇明合至是因崇明反調兵水西邦彥遂挾位叛以應之見明實錄謹附識

朱燮元傳副總兵秦衍祚等亦攻克遵義

臣

方燁按

是時賊首尤朝柄楊維新等據遵義衍祚副將侯良柱督兵二千攻克之見明紀事本末謹附識

朱燮元傳總理魯欽敗於織金

臣

方燁按欽於四年

七月偕總兵劉超拔敗巖頭寨破平茶又與總兵黃
鉞分道深入邦彥大寨西奔遂庾勝至織金斬獲無
筭及明年正月欽等渡河還中伏敗死者數千人見
明實錄傳未詳載謹附識

朱燮元傳貴州巡撫王域為督臣移鎮貴陽有十便

臣方煒按域所陳移鎮十便明紀事本末諸書皆無
考謹識

朱燮元傳燮元授計成名誘賊至永寧乃遣總兵官林

兆鼎從三岔入副將王國楨從陸廣入劉養鯤從遵化入合傾其巢

臣

方燁按是時廷彥分兵四應力

已不支燮元復令羅乾象以奇兵繞其背急擊之賊大驚潰見明紀事本末謹附識

朱燮元傳

徐如珂附

賊大潰轉戰數十里斬首萬餘級

遂拔蘭州

臣

方燁按三年五月崇明奔入舊蘭州

城羅乾象督兵破之掃其巢賊遂狼狽走見紀事本末朱燮元傳及石硅土司傳所載亦同此似以拔蘭

州之功專歸如珂矣謹附識

朱燮元傳

劉可訓附

二年與總兵侯良柱破賊十萬衆

於五鋒山斬崇明及安邦彥

臣

方煒按是時四川

巡撫張論上功狀不及黔將于是總兵許成名等與良柱爭功朱燮元頗右黔將朝議不能決賞久不行至是川中撫按及羽健皆訟可訓與良柱功見

事本末謹附識

李燹傳烏撒土目安效良亦與通

臣

方煒按烏撒之

陷也指揮管良相死之見明實錄載未載謹附識
李檣傳又先後攻陷廣州普定威清普安安南諸衛

臣方煒按賊之攻普安安南也雲南都司李天常帥
兵四千救之賊將羅應奎偽降誘至疊水鋪伏發全
軍沒于是諸衛先後陷見明紀事本末謹附識

王三善傳天啟元年十月擢右僉都御史代李檣巡撫
貴州 臣方煒按土司傳元年八月以王三善為巡

撫此作十月互異未知孰是謹附考

王三善傳三善等大軍亦至遂奪龍里城

臣方燁按

賊黨洪邊土司宋萬化糾苗仲九股據龍里先此總兵張彥芳將兵二萬赴援皆隔龍里不能進至是奪之見明紀事本末謹附識

王三善傳三善渡渭河降者相繼師抵大方

臣方燁

按三年六月三善督兵禽土司何中尉等進營紅崖連破天台水脚等七囤而張彥芳亦破賊于羊耳追至鴨池河遂深入至紅烏岡諸苗奔潰乃率師直抵

大方見明紀事本末傳未詳載謹附識

王三善其愚故縱轡衝三善墜馬

臣

方煒按三善

遇害後監軍御史傅宗龍以計獲其愚誅之見明實錄謹附識

蔡復一傳遣總理魯欽等救凱里斬賊衆五百餘

臣

方煒按凱里土司運道咽喉也邦彥結諸蠻困其城長官楊世蔚不能守復一乃遣欽及總兵劉超救之見明實錄謹附識

